

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
NOV 4 1989

T 3194/4260.88

0003

南昌府志卷三

谷佛大學漢和
圖書館珍藏印

建置

城池

官署

公所

坊表

養育所

漏澤園

相其陰陽觀其流泉立國者審形勢之宜凡有建置無乖
向背矣維郡亦然南昌屬省會郡而統於國矣自城池倉
庫官廨學校郵傳賓館之屬昔之所在今或易焉設郡以
來紛而難紀今備徵故籍即現在可稽者列之其亦三輔
黃圖之支裔歟

城池

南昌府城即江西會省南昌新建二縣附郭漢穎陰侯灌
嬰築豫章城廣十里八十四步闢六門南曰南門松陽門

西曰臯門昌門東北二門各以方名詳見雷次宗豫章記
晉太元中太守范甯更闢東北西北二門合前八門省志

按晉書范甯傳云終桓溫之世兄弟無在列位者溫歿
後始解褐為餘杭令在職六年遷臨淮太守徵拜中書
侍郎因王國寶驅扇被疏求補豫章太守在郡以開城
門等事劾抵罪攷通鑑綱目載孝武帝寧康元年七月
大司馬溫卒太元十四年冬十一月以范甯為豫章太
守則范甯更開二城門自在太元中舊志作咸安中一
作太康一作咸寧皆失考也今訂正

唐初築城西南隅四分之一即今府治所也垂拱元年洪

州都督李景嘉增築之凡八門吏部侍郎越州徐浩題額
元和四年刺史韋丹更築城東北隅廣比漢城倍之置敵
樓於上其東門樓久頽亦改建焉貞元十四年觀察使李
吳闢東南樓而新之號避暑樓夏日會宴於此南唐保大
十年建南都於此宋洪州城周三十一里門十六直南曰
撫州繚而西轉曰宮步一名曰寺步曰柴步曰井步一名
曰章江曰倉步一名曰觀步曰洪喬曰廣恩曰北郭十門
皆濱江繚而東轉曰琉璃曰壇頭曰故豐曰廣豐曰望雲
五門皆平陸熙寧十一年太守元積中修城東門會鞏有
記紹興六年李綱來帥以城北歲壅江沙遂橫截東隅入

三里許其廣豐北郭廣恩故豐四門廢門凡十二元仍宋舊至正十一年寇兵起蔡穎蔓延江淮武昌失守江西行省平章道童郎中普顏不花募壯勇具戰備城門十二各建樓櫓次年寇至死守者五十有四日寇退包希魯有守

城記

明初壬寅歲定洪都大都督朱文正以城西濱江不

利守禦改築移入去江三十步展東南二里許視舊城殺

五之一周二千七十丈有奇高二丈九尺厚二丈一尺東

南北三隅浚濠長三千四丈有奇濶十一丈深一丈五尺

宮步井步倉步觀步洪喬五門廢建七門東曰永和又名澹臺

以門內有澹臺墓舊名壇頭有仙人黃紫庭之壇在焉東南曰順化舊名琉璃以門內延慶寺有琉璃

像南曰進賢舊名撫州以道路相通得名又又南曰惠

民運米惠民倉由此舊名西南曰廣潤西曰章江以在江濱故名

舊曰南昌孫策遣虞翻與郡守華歆交語於此北曰德勝舊名望雲門李綱移門

樓七角樓四舖七十座障堞二千六百八丈分廣潤惠民

進賢順化四門屬南昌永和章江德勝三門屬新建有水

關閘在城南廣惠二門之間城內湖水於此出城濠外別

有閘以蔽江水明初壬寅年浚濠時置萬厯七年巡撫劉

斯潔屬知府王三錫撤去廣潤惠民章江三門月城內舖

廊并拆傍牆蓬舍以防寇賊踰越三十六年巡撫衛承芳

屬知府盧廷選清查城內古跡火巷還官拆傍牆屋舍

國朝定鼎悉仍明制順治十五年巡撫張朝璘疏請捐修康熙四年巡撫董衛國捐修十八年冬章江門外居民失火延燒三百餘家新建知縣楊周憲以商賈輻輳市廛逼近官街遂逐戶清查各退出二三尺置火巷以防後災五十三年德勝門燬重建六十一年廣潤門燬巡撫王企靖重建雍正七年布政使李蘭重建章江門城樓乾隆七年廣潤門城樓復燬巡撫陳宏謀布政使彭家屏清查傍城各舖所占街道擴修火巷以備火災十三年新建知縣邱蘭標奉檄修理嗣後南昌縣所屬城垣於乾隆十九年因廣潤門城樓被焚城墻間有坍塌大修一次二十四年小有粘

補新建所屬於二十四二十六兩年修理至四十六年巡撫郝碩題請動支公項銀一萬四千八百餘兩令署南昌知縣龔珠新建知縣邱堂分領興修

省志 據冊新增

按一統志今城築於明太祖定洪都之後自漢迄元與南昌故城同又江城名蹟記李忠定嘗言洪州城池北面尤爲濶遠皆係舊開田地無人居止又城外一帶盡是漲沙高與城齊可以下瞰若欲爲可守之計不得不亟爲修治此亦經理江右者之所宜知也

宋曾鞏記曰南昌於禹貢爲揚州之野於地志爲吳分其部所領八州其境屬於荆閩南粵方數千里其田宜秔稌其賦粟輸於京師爲天下最在江湖之間東南一都會也其城之西爲大江大江之外爲西山州治所因城之面勢

為門東西出其西門既新而東門獨故敝熙寧九年余為
 是州將易而新之明年會移福州又明年自福州被召還
 京師過南昌視其東門則令守元侯既撤而易之元侯以
 余為有舊於是州來請曰願有識余辭謝不能而其請不
 懈蓋天子諸侯之門制見於經者不明學禮者以為諸侯
 之制有臯應路門天子之門加庫雉然見於春秋者魯有
 庫門有雉門見於孔子家語者衛有庫門或以為褒周公
 康叔非諸侯常制其果然歟蓋莫得而考也在雅之綿古
 公宣父徙宅於岐作為宮室門墉得宜應禮後世原大推
 功述而歌之其辭曰廼立臯門臯門有仇釋者曰仇言其
 高也又曰廼立應門應門將將釋者曰將將言其正也則
 諸侯之門維高且嚴固詩人之所善聖人定詩取而列之
 所以為後世法也今元侯於其東門革陋興壞不違於禮
 是可書也將求余之識會余未至京師守明州元侯則使
 人於途於明州速余文不已按南昌之東門作於淳化五
 年於其棟間題曰皇第六子鎮東節度洪州管内觀察處
 置等使徐國公元偓尚書戶部郎中知洪州軍州事陳象
 輿也以籍考之徐國公後封密王太宗第六子受命保茲
 南土實留京師則作門者蓋象輿也至門之改作凡八十
 有九年元侯之於是役其木取於地之不在民者其功取

於役卒之美者其瓦甃金石髹彤黜堊之費取於庫錢之
 常人者自七月戊子始事至十月壬子而畢既成而南北
 之廣十尋東西之深半之而高如其廣於此出政令謹禁
 限時啟閉通往來稱其於東南為一都會者而役蓋不及
 民也元侯名積中又明年實元豐二年
 包希魯守城記曰皇帝纘祖宗之治慈孝恭儉君天下二
 十年四表無虞民物阜繁氣機相乘禍孽斯作至十一年
 兵起蔡穎蔓延江淮武昌失守江西行省中書平章政事
 道童公奉旨得以便宜行事郎中普顏不花公力陳大義
 倡勵有位藩臣臬僚暨百執事咸大儆惕以承平百年戎
 政弗修隆興郡城藩府政蒞表率百郡僉究豫圖以固守
 禦適驛使道經山東郎中公致書與其親故訣誓與城殉
 死生弗渝前湖廣左丞章公伯顏練達戎機時已告老居
 於臨川禮幣固請章公以國世勲不憚者艾慷慨起應室
 家具至以定眾心僉憲瑣魯灘公則出罰鍰權錢幣以足
 供需郡守安公謙則捐祿秩宣勤勞以繕城櫺憲經歷吳
 伯都刺君與郡博士趙君睿咸激義以陳詞前辰州路照
 磨范君栲叅經畫以定計明罰飭令用典軍政則郡推官
 董君某也於是眾思畢集以締厥謀乃求人才募壯勇具
 戰備充資儲城門十二各建樓櫓定職守凡文武之在位

需期者分掌管籥捍制稽察右榜進士十有六人在焉城
 內則四廂設官列巷置長編民兵為十七屯環列城上與
 廂巷之兵晝巡夜警少長額領什伍相維首尾相應隱若
 連雉民始有堅守之志明年春兵至擁眾百萬驅馬揚塵
 張颿蔽空集城西之石頭口郎中公酌酒祝天矢以死戰
 率弟僧奴與都事索驩君躬部果銳東西分道徑挫其鋒
 妖偽惑連愚民既散復來圍城數周突蕩愈力廂官巷長
 乃率丁壯兒童婦女運甃礫石激啤馮陵并力以拒旅復
 緣陸設壘距江為屯平章公專居南門總權督戰以遏其
 衝左丞章公叅政王公某憲僉瑱魯灘公周公驤咸致厥
 力當城北阪地勢隆起門曰新城實為險阨叅政朶綱公
 憲僉韓公淮經歷吳伯都刺君皆沈機密畫設變制勝理
 問官忽林赤公屢出秘計幽伴鬼神旅之牙角賴以犢牯
 壇頭琉璃則東隅之二門也旅所往來南北交會受攻尤
 急郎中公備禦嚴整躬犯矢石開關延擊殺獲數千竟不
 敢犯郎中呂公彬省照磨吳伯都刺君據城西偏門凡有
 七船艦所趨晨夕窺瞰因勢設智乘水攻之靡不克捷水
 軍之作戰艦之制則前監郡阿思蘭之策多為自三月至
 於閏三月城之血戰死守者凡五十有四日嘗晝日清朗

龍現於隍風雨暴作平章公以得天順詢於左丞即日乃
 飭勵士眾嚴約諸門期以詰旦殲滅醜類而後朝食理問
 官忽林赤公復出奇計及四鼓密開北門直擣醜壘以焚
 其巢旅大震踣斬首數萬諸門悉啟水陸合攻遂大敗潰
 民舉焚香列拜以報揚再造之功平章公復慮餘孽旁煽
 乃擢掾史周君山為檢校官以取富州戰銳以死命掾史
 周君繼善代領其軍以捍西南掾史程君德寶審達機宜
 擢檢校以控東北江東之寇竊據進賢則以水兵千戶定
 任君進賢尹辛君敬連兵搜討既而定任君陞為元帥以
 制臨江陞辛君郡判官專扼江東之交以為藩蔽皆著功
 城守者也又明年叅知政事朶綱公受旨與元帥章公妥
 因撫州同知章公完者任定盱撫六月江西丞相亦憐真
 班公奉詔南征饒信上官於藩未幾而丞相薨左丞火你
 赤公專領其兵以復瑞州袁吉臨江三郡之寇賴其匡攘
 是則著績於戰守致力於平盪以大小之臣確秉忠貞殫
 極勞慮而然也當兵之興人無定志凡所侵迫如升虛邑
 大江之南以湖廣士馬之眾形勢之險一鼓以陷隆興單
 弱寡援矧惟饑疫苟非蒞之者矢心自勵忠以殉國誠以
 動天撫民以仁激民以義曷能結人心於危疑之際以致
 死守哉是以屬城嚮風競致死力南服以平詩云懷德維

寧宗子維城由平章公而下非為國人則為勳舊國人有
 宗子之道勳舊皆懷德之臣故平章公能屈已以致章公
 章公亦克副厥志若郎中公則魁大對者也其能結人心
 以為固者由禮義結於已之心也國家以經術宣治化取
 人才兵興以來凡死節効命舉進士知經學者為多先王
 之教不既著哉城之俾無壞者必由是也推是以往豈不
 置天下於無疆之固斯民其永有利哉且事平而聞諸朝
 凡城守者在官則錫賚而陞官於民則予鈔之為錠者二
 十萬功多者錄用之其在臣庶抑何憚而不守忠貞以自
 利哉郡人慶城完而生以全若北山沙湖之在南昌進賢
 介江東西之限於城為近尤得倚聲勢以自衛其民之知
 義者羅中樊權李立郡若干人謂宜紀實以篤不忘前貢
 士崇仁文學熊釗采輯大概來俾為記故効輿人之誦以
 記之非所以為溢美也若夫銘鼎彝而垂簡冊則有太史
 焉平章公今進大司徒郎中貳憲使章公既沒而江西右
 丞之命下自是以降官階咸陞不備列也
 張朝璘捐修城垣以資捍禦疏為飭修城垣以重衛民之
 計事該臣看得城垣之設所以捍外而衛內也必高堅完
 固而後緩急可以有恃守土者豈可任其傾圮而不為修
 葺乎矧江右寇變以來自省城以及郡邑所在殘毀兼之

恩詔

年久頽壞濱江衝塌者不一而足臣謬撫茲土日履綢繆
 桑土之思凜遵
 恩詔不致累民多方勸激除動支額編外行令道府等官設法修
 葺一時文武諸臣慕義嚮風捐修恐後首自省會城垣城
 樓次而豐城寧州靖安進賢等縣之城次而瑞州府屬高
 安新昌二縣之城又次而臨江之新喻吉安之永新建昌
 之廣昌縣城併饒州袁州二府城以及樓臺窩舖俱已煥
 然改觀屹然鞏固矣雖各處城垣工有鉅細各官捐助數
 有多寡而勉力急公衛民恐後之心均不可泯緣奉有該
 督撫具題即與敘錄之

恩詔相應請

旨敘錄以鼓勵將來者也奉
 旨工部察議具奏

豐城縣城在縣西二十里唐永徽初遷縣治於章水之東
 故無城元延祐初州尹汪從善剏築土城下甃以石以遏
 暴漲周廻十里環郭六門東曰正信西曰折桂南曰劍池

天寶北曰通江望仙內有子城一里二百步歲久傾圮至
 正十六年冬省臣火你赤平李明道復命築土城尋潰明
 正德七年知縣吳嘉聰重築土城高丈餘廣四里尋被水
 圮嘉靖四十年廣閩寇警知府韓弼詣縣相度率知縣王
 徽猷更築磚城周一千三百六十丈有奇高一丈七尺五
 寸厚六尺為四門曰大東大西大南大北門各有樓又小
 門七曰折桂廣益登仙皇華望仙江壩今小東萬宋有記
 李貴有頌德序 萬曆十四年洪水傾城若干丈知縣韓文
 修之三十六年知縣張廷拱重修四十餘丈城南有斗門
 石閘洩城內水出於濠崇禎十年知縣郝錦加修城堞

國朝順治十二年雨圮知縣宗彝補築十六年三月又圮知縣
 何士錦捐修康熙元年士錦再修之二年復奉文加修乾
 隆四年大圮知縣楊志道詳請動帑興修自有記九年知
 縣朱懷棧領帑監修改皇華門曰高陞城濠東自洪河歷
 虹橋繞折桂門而南入於坪港湖西自石橋繞登仙門達
 斗門橋入於坪港湖北臨劍江石堤險峻若重城矣斗門
 石閘瞰南門右一邑水所洩也袤六丈六尺高一丈四尺
 濶五尺舊甃以石甚壯知縣韓復修之邑治東北水自甘
 家湖繞而前歷硯池達會家湖渠約長一百六十六丈深四尺廣三尺又東
 自達湖歷藍家巷達丁家湖滙於沙湖約長六十餘丈深廣差殺於前渠

又東出東禪巷由學背湖月池湖腰帶湖出東門溝約長四十丈深廣殺

於前渠達邨家湖並通明溝連珠湖入蓮湖沙湖象鼻

湖會於會家湖達卻家湖約長一百三十二丈三尺廣五尺深如之洩於斗門

入於坪巷以上皆韓弼清澹重甃以石西北水自相陽湖歷務前約長一百

四丈達會家湖又西自陽靈觀左家橋南橋歷火巷南巷

達會家湖又西自花橋歷仙音巷觀音閣以西西門以東

歷陶家港約長四十丈廣二尺深四尺會於陸笳湖約長二十丈廣五丈肥株湖

約長三十丈廣六丈南禪湖約長四十丈廣十丈歷南橋湖約長一丈廣如之深七尺達崔

家湖洩於斗門闡入於坪港縣志

萬家記略曰豐故無城而以城名則城之不可後也豈惟今哉乃今之城以寇攘甚始克建得非昔人所謂功待時

而彰事有激而然歟然非上下相與皆強幹敏特任事之

人而能有濟者鮮矣往者華林之寇邑令吳君嘉聰謀築

之以址隘甃簡河決水齧尋就圯幸聖化涵濡民知嚮方

邑雖無城賴以無虞嘉靖辛酉閩廣寇起犯虔吉撫建之

間樂安崇仁宜黃俱以無城陷維時巡院段公按部至豐

慨然曰茲會省上游也無城其可哉適韓公守南昌且故

宰豐豐民利疚概於中尤切段公乃以城咨撫院張公且

下其議於守巡曹公何公祝公謂經事者圖成樹烈者擇

使茲鉅任也非南昌其可哉而宋等咸守官在朝樂受成

之有人而懼浮言之易眩也亟貽書以佐諸公之議而邑

侯王君亦列狀以請韓公毅然曰邑事無問巨細皆主太

守况豐吾故治乎誠不可以他諉也乃即詣豐相度之誠

上之鳩集之其式廓俱仍舊制城址增三之一其役擇民
之有力者差等受之上不過三丈下則兼數人木甃瓦石
僱募之需每丈給銀十一兩五錢有奇俾人各以所受畢
其力而追呼之擾不聞其費則兩院出贖金二千兩南昌
發牙稅鈔價糶邑庾粟七千暨鄉縉紳之所助者得六千
兩有奇蓋公私所入綜之二萬二千有奇矣畫既定乃屬工
於王而以八月既望時植幹適寇數千自撫猝逼豐豐民

洵南爭竄避時諸司方在棘闈報至段公誠南昌曰亟往
 哉南昌至即選健步持虎符牌趨鄉民無洵吾汝援矣寇
 聞即夜奔樟盧公督兵擊之俘其渠以歸於是洵洵者哉
 而救之者陳陳矣會栢泉胡公奉命來撫聞豐大建城偉
 之督南昌復來視城遂以仲冬月城成廣一千三百八十
 丈有奇高一丈六尺有奇內縮四分之一厚六尺為門四
 為小門七邑故中窪外隆遇雨則水無所洩南昌戰然曰
 是豈可虧一篑之功而不為水慮哉乃浚象鼻硯池諸湖
 以瀦之疏通明溝以導之改築斗門石閘廣倍於舊以洩
 之而城東南北三隅當夾水圩墻之上為力不固將侵蓄
 如往乃合溝湖門閘俱甃以石嗟夫一城之築春秋必書
 重勞民也茲者邇卜築之初以迄考成僅日之百焉何其
 速哉且費至數萬金役夫至數萬人而民不以為勞使在
 春秋安知不以為不績而嘉之歟諸公謂宋嘗與其議來
 取文以記之故詳敘不績鏤諸城隅張公名元冲浙江山
 陰人胡公名松直隸滁州人段公名顧言直隸遵化人曹
 公名忬湖廣江陵人何公名大章廣東海陽人祝公名繼
 志浙江山陰人盧公名岐嶷福建長泰人韓公名弼浙江
 平湖人尋遷江西提學副使王君名徽猷福建晉江人法
 皆得書故書
 李貴頌德序嘉靖辛酉夏秋之交閩廣

寇作大肆掠於江郡越月陷樂安崇仁宜黃咸以無城寇
 入如墟受毒加烈焉豐故有土城圯於水且盡舊址畧存
 先是撫院何公嘗至豐圖所以城豐者難其任不果城至
 是羽檄交馳邑侯王君徽猷上其事撫院張公按院段公
 方以豐為虞亟令城之郡守懷南韓公憮然曰城守余職
 也余寧使豐無鳩乎遂詣豐計度城役基址揣厚薄議遠
 邇程土物罔有不親簡邑民有力者進之庭賦丈受準直
 豐庶不作屬役於王君臨之以儆厥事經始以八月日板
 幹方裁寇倅分數千人逼豐境邑民洵洵竄避時公在棘
 闈即請於按院出亟趨豐安集之乃選健步持虎牌夜馳
 告寇將所入鄉曰無恐糾爾眾以捍賊余爾援鄉民稍稍
 聚觀咸喜曰韓公來我生矣敢不如命賊間歸報亦驚曰
 韓公故多奇智疇敢犯之遂兼程過豐境不敢肆掠夜奔
 樟鎮憲僉盧公提兵來擊賊擣其巢擒賊首以歸賊眾潰
 去豐民安堵公復來督其成先是公度費所出糶廩粟近
 萬石兩院下贖金二千鄉士大夫輸俸以助役共計得銀
 五千有奇不足公乃懸象令鄉民不受功願以資佐者聽
 於是競至一判之料量為平民咸樂輸而百費舉矣城
 東南隅夾水遡水而城公慮其蓄令以石甃防焉邑中窪
 而邊亢公慮水之無所洩也清故湖使瀦水焉清故溝使

導水焉陡門石閘廣舊以通於濠使洩水焉三踰月而告
 訖工城圍一千三百八十丈有奇厚六尺高丈六尺有五
 寸內縮四之一為門四為小門七是役也工繁費鉅舉之
 甚棘而成之甚速豐民不以為勤焉公昔嘗令豐政務具
 舉以兩造至者日千百計一日輒不忘豐民蓋警服於公
 之威明素矣敢不殫力以稱上之任使公益家視豐而子
 視我豐民以恤其難隱厚其藩衛聯其什伍時其訓練
 胼胝焦勞以保障我豐者至周也公轄八邑乃於豐德加隆
 焉豐民雖俎豆公於千萬禩寧足以報施哉昔周中興山
 甫城齊召伯城謝而吉甫作頌以美之克有辭於永世公
 之城豐其功等於齊謝諸賢良文學各為詩歌以頌德纒
 纒乎有周之遺音矣博士周君望錢君廉彙以成帙題曰
 城豐頌德調貴職史也徵言弁諸端貴方慚無穆穆之音
 以揚詡公之偉烈若城之顛末固目所覩紀者敢僭紀之
 以俟知言君子云

國朝知縣楊志道城內溝濠記曰事莫患於更張而尤莫患於
 因循苟有便於民者而徒自安於遷就則前人之規畫盡
 湮而因循之弊遂較更張而倍甚余自戊午涖豐見其城
 郭宮室頽靡不整者難以枚舉而最急惟築防之役石土
 二工帑金費萬以地居下流之衝而勢難獨當也邑既瀕

江不惟在外之水苦其奔潰即在內之池潢溝渠又多所
 閉塞每值大雨連綿圍居淹漬道路汨沒幾不得所歸宿
 余訪之故老稽之邑乘已知溝有支有幹支分千百幹則
 東西水分三道俱以縣治為主由後而前層層曲折環繞
 外則各有大總東其東由東禪巷經丁家巷學背各湖過
 黎家園出東門溝逆流而上達學前各湖入蓮湖沙湖象
 鼻湖滙於會家湖由濠出斗門閘其西由大西門順流而
 下入陶家港經陸茄湖肥株湖南禪湖以滙於崔家湖出
 斗門閘又西北最高分流以達勢盡朝南歷治背者兩注
 螭眼池入硯池湖滙於會家湖歷花橋者一支由後巷并
 入陸茄湖一支由仙音巷滙於崔家湖總出斗門閘為宣
 洩之所今皆盡失其故道蓋百有餘年矣無如外勤防築
 不暇內及越明年築防畢邑紳士遂以鼎新學宮并疏濬
 水道請幸而學宮賴紳士主持捐金數千兩巍然一新焉
 至疏濬重役方為民力恤而士民咸言時不可失事有難
 辭值大中丞岳祭戰遙臨親視江隄工竣即諄諭城內水
 道務加疏濬余復申明各憲俱念切民瘼謂宜速為一時
 勦其成者王少尹鏞傅尉繩祖及各紳士盡力勸督不避
 暑雨遂不三月而泥沙之淤者以決橋梁之圯者以修市
 井之所竊據隱匿者以還而水涓涓有歸宿矣且夫水之

建置

有脈絡也猶人之有血氣也人之血氣通而後精神著地
 之脈絡貫而後靈秀發古者營建都邑司空必先厥司徒
 相陰陽而觀流泉覺自然之勢固不可阻抑者宜豐之
 學士文人咸聞而樂赴也工竣之日闔邑因以奏功之速
 而欲刻圖以示後余以因人之力相土之宜順水之性此
 固非作而致之也嗟乎前人創之而余踵而行之則目前
 之水可免閉塞使延之百年而茲之疏濬者復忘其舊
 蹟則又異時有志者之所抱恨也爰圖繪方位并深廣丈
 尺及董事姓名捐貲金緡於左俾後之職斯土者睹遺文
 而不以因循累民焉斯誠有所厚望也於是乎記

進賢縣城宋元以前未設明正德五年江西盜起署知府

同知汪穎建築城議知縣王紀創築土城為六門門各有

樓省志作知縣朱英加砌以壁十二年知縣劉源清議加磚石未果嘉

靖三十年知縣陳鎮重修三十八年知縣程光甸更築址

以石覆以石中壘以磚周一千三十丈有奇高一丈七尺

厚一丈門并樓仍六東曰啟和西曰迎恩南曰來撫北曰

拱極東南曰文明西南曰田洽隨以水西街居民眾自來

撫門出入不便復關水西關制視諸門稍隘東南址逼民

居邑人楊重俊捐基橫四尺直十餘丈廣之城上窩舖二

十四所萬曆三十六年大水城圯知縣周光祖重築萬曆

四十五年知縣沈景初改東南文明門於學宮前建甲秀

樓崇禎十三年知縣李允佐增高之

國朝康熙三年知縣聶當世捐修乾隆八年動款復修熊人霖

有記 縣志

按省志自十二年知縣劉源清議加磚石以下編入武

寧悞

國朝熊人霖記曰天官北宮真武其宿南斗為廟危為蓋屋營室為清廟壁為文府皆主營建版築之象而斗分野江湖乃進賢馱以南州分野上應天光其星在龍角平道間青青有章蓋水火之所和演陰陽之所際會地也而得其天焉邑自唐稱鍾陵縣而析疆伊域肇宋崇寧間粵有明正統初龍巖張侯冲來蒞是邑相土協謀草創官司廬井正德間泰州王侯紀稍崇飾雉堞樓櫓為守望資迄嘉靖南贛寇發大君有命撫臣行節增築於是太湖程侯光甸益廓之崇禎時潛山王侯楊基更增其三版今垂四十年有基勿壞城之庇吾進邀天之福未嘗有復隍之虞矣康熙癸卯監利二瞻聶侯以進士來宰是邑後繭絲先保障劍及垣履及城見雉之明者或湮亢者或俯且城上不得並驅倘然介馬而馳之爭取弧蚤先登奚由控縱聚吏士咨詢之曰茲邑其肇有寧宇何敢以興雖然處泰之上六而有惕然復隍之虞居安思危又奚敢恃陋且邑為吳楚閩越之衝地左君山右洞庭北宮亭險可恃也則亦人所以爭進邑全省庇也可弗周於庇進哉猗聶侯奉簡書而吏茲土其以固吾圉也其以字吾民也邑城而既弊矣修

築經費弗資使狃目前而為圖是日中不彗也抑責之且夕急就焉是極重之賦不能蠲而土功箕歛益困之毋乃反裘負薪之譏乎侯蒞治三載日思所以庇吾民也所見無非城者於是節衣縮食計薪俸羨積若干計金矢夙儲若干月計不足歲計有餘爰於乙巳之春肇修焉范土而陶縮版而築騎危城而蓋守望之屋拓城址而俾之甃石焉廣度以軌役力而償之不病農飭材而購之不病工湮者以明俯者以亢城上可以旋駟清梁夫之餽餽擊柝者營室建而畢工東壁中而考成侯建中權之鼓耀旌旗以震疊江湖之輕心者惟我進之士若民則知有城之庇而不知有城之役也聶侯直克稱厥職矣維昔各上臺明威久樹風聲淵思夙圖桑土故聶侯得受成而上其功云國功曰功民功曰庸功久曰閱誼當勒之貞石以志勿翦至司諭廬陵曾君翰邑丞贊皇安君克純典史馮錫祿巡司茅汝明沈文衡邵可成皆効力馨鼓例得並書侯名當世順治戊戌進士銘曰爍進賢兮天光臨官吾邑兮庇吾民鍾在陵殷敷兮鼓在埔勿亟蛟鼉惕伏兮江湖謐泰無虞兮師貞吉歌蔽芾兮罔攸射

奉新縣城漢靈帝中平時立縣治於新興鄉磐山唐神廟

二年縣丞高良弼徙於馮川之北舊無城長慶三年縣令劉正一築土城周五里建南北二門歲久圯明成化二十二年知縣鄧成設五門東門在迎恩坊今之老東門是也黃虞再有記

西門在天津橋南門在學舍右北門在龍山

左建昌門在寶雲寺右正德五年華林寇起副使吳一貫知縣鄒鯤重築南盡河岸皆以磚壘北抵山麓東西廣益倍之皆以土築覆以椽瓦立四門置廂樓周迴鑿池以防衝突嘉靖元年水漲城圯知縣朱雲鳳修之後五十餘年城益圯隆慶五年知縣陳雋詳請動公項銀修築至萬厯元年九月工竣萬厯九年知縣朱英詳請加甃嶺北道憲

副前奉新令金應徵議以南豐羨銀轉給本縣兵備僉事石漢贊成之遂築磚城東門計一百七十堞南門計三百堞北門計二百一十七堞共一千二百八十七堞八閱月

工竣顏其門東曰賓暘西曰齊霞南曰迎薰北曰拱辰

東曰通化西曰顯忠南曰惠政北曰龍山南門左右各開水關迤東復開馮田門蔡國珍有記萬厯二十二年知縣馮焯移西南水關於

學宮之前拓水城池以環之額曰遊聖門今東南西北及右水關如故馮田門塞於萬厯三十年左水門塞於萬厯四十七年俱廢

國朝康熙二年城復圯知縣黃虞再詳請修砌總督張朝璘捐

銀五百兩米二百石巡撫董衛國捐銀四百兩米二百石
 本府知府葉舟捐銀五百兩黃自捐六百二十兩米三百
 石邑紳民捐助有差凡七閱月始竣雍正四年知縣王藩
 捐修六年知縣童希睿復修十年城又圯東門城臺城樓
 俱圯知縣趙知希詳請捐修自十二年十三年及乾隆元
 年每年繕修計費養廉銀三百四十四兩零而東南壯觀
 矣其外城高一丈六尺內城高一丈東門至北門長一百
 二十九丈北門至西門長二百六十二丈五尺西門至水
 關長一百丈五尺水關至南門長一百三十丈南門至東
 門長二百六十丈五尺共計八百八十二丈五尺舊有礮

臺八座今廢城濠古蹟尙存濠外臨馮水 縣志

按省志載萬厯間奉新知縣胡東陽李呈芳周道昌崇
 禎時知縣璩伯崑均有修城事奉新縣志同攷胡東陽
 諸人俱係武寧知縣有秩官表可據蓋省志誤入奉新
 而縣志復沿省志之誤耳

黃虞再老東門記曰今東門外二百步許有廢基歸然猶
 存詢之蓋舊東門也因富陽水沿北城東流又東沿城南
 流寢為城害故稍內徙以避之門屬於垣舊者隨以在外
 而廢焉予觀水脉由此會歸馮川環環繞繞有益風氣但
 城既內徙而水則殺而漫直而疾不復蜿蜒之態何有之
 元之奇或非作者初心矣予就而葺其基豎文昌閣於上
 以迎巽風且用之關鎖水脉焉復堤焉護而收之似覺曲
 折有勢非復殺而漫直而疾矣不寧此也臺閣外峙屹然
 屏障設伏守險以備捍衛守土者意固如是乎若徒狃地
 理之說而故為不經之役又非予之所敢出也

蔡國珍度田繕城記曰朱令君令奉新之三年庚辰政思與斯民計久遠適奉履畝均賦及城邑之令乃卽次第力舉而行之皆有大造於吾邑云奉新土故磽瘠賦且煩往鬻產者率利厚值而薄其稅奸富遇攢造又賄胥吏而浮寄之攤賠滋害令君方釐正之未已乃履畝令行咸謂因地制賦賦因之成均亦不易爲三壤而一則焉斯良矣然慮弊生於則壞壤則矣卽舉則而兩之恐則上下者偏於上則中下者偏於下則又有不均之嘆焉令君察乎此擇人而任嚴掣丈而討其不法者丈成雖分上下鄉爲兩則而能參酌其宜斯哀益得中而民不病於偏累矣此度田之當紀者也邑故無城雖洊經寇亂累土庫薄民無可守雖間議陶甃輒以無資而寢頃年山寇蠶發令君軫念倉府獄市遂力請而城之并請得盱江隱陂若干令君卽差日鳩工相地爲植悉以所請陂量編戶糧丁而均委之畫地分工而力董其成凡數閱月而就蓋不勞而功大不費而惠廣勿亟而事速成殆爲甃城者稱首而功莫上矣此繕城之當紀者也二役成宜勒石以紀成事值令君以擢行鄉諸父老乃造予曰所貴於縣大夫者先成民而貽之以永圖而鄉大夫則在念功稱羨有以垂不朽朱令君所以成民者其永有利乎則不朽之事公爲政矣余惟民之

大事唯養與衛養非衛莫安衛非養莫守二者不可缺一者也顧事大且難彼規避而不力者無論已卽力行之或不勝其煩且擾抑亦滋弊如蝟且以修圯遺後之人不少藉令行而善矣求其不動聲以色民悅而事集者尤不易得也令君兼舉之而衆善具焉此不世之利而語所稱有治人者此矣其他政皆稱是以是而垂不朽也固宜余往俞父老請未及爲會余有環名方事敷歷且與令君居宦事懼不知者謂予爲市交不果爲今余得諸父老修前言故不辭爲之碑令君名南英丁丑進士浙東山陰人

靖安縣城自南唐創縣有城周二里歲久圯廢明正德六

年華林寇警按察副使吳一貫知府李承勛知縣萬士賢

始築土城四隅有門門有樓董詒有記嘉靖四十三年知

縣趙公輔更築磚城甃之以石徙南門縣治前遷東門按

卯方北接河流西達清湖增高一丈七尺廣八尺周圍五

百丈有奇自甲子秋至乙丑冬功成 吳鎬有磚城記 萬曆

五年知縣鄭煦改南門於西南隅改東門於東南隅

國朝康熙七年知縣任嘉瑞復遷南門如舊址遷東門於城隍

廟側二十八年雨圯知縣高克藩重修雍正元年知縣黃

天球復改南門於西南隅改東門於東南隅為今址乾隆

二十六年知縣李紀重修 自有記 濠水西入於清湖與雙

溪合環繞縣城 縣志

余爵

董諮記曰正德辛未夏五月華林賊立寨瑪瑙崖離縣二
十里據險肆惡劫掠鄉村男婦逃避縣治蕩然勢日猖獗
時承平日久民不知兵卒難捍禦秋八月左都御史應城
陳公領勅總制至省城乃選郡守李侯貳守汪侯統兵守
備茲土二侯督戰布衣草屣持弓挾矢不愛軀命奮勇當
鋒為士卒先時邑城未就居無定在或於火場依栖或依

高山屯劄憲副吳公參將趙公議曰保障不固人心渙散
兵無所依戰無所據宜築鑿之亟為經營用克有濟於是
設法處置刻期興作未期月門禁敵樓亦皆完固而士卒
得以養神蓄銳將帥得以運籌帷幄敵至得以從容決勝
而無驚惶 虞癸酉春二月十九日元首就擒餘黨
盡戮遠近人民扶老携幼歡欣以歸文武百司軍兵俱快
奏凱受賞謳歌踴躍莫不歸功於城池之為弭盜安民之
所由基即方之李唐平淮蔡之捷不是過也諮躬歷其難
目睹其詳書此以俟後之君子

吳鎬磚城記曰靖安南昌郡之屬邑也創自南唐迄於國
朝仍溪山之便未建城池至正德辛未瑪瑙賊變干戈搶
攘懼無守備憲副使吳公太守李公邑宰萬公權築土城
便立四門制甚率略凡方隅之辨險阻之設廣狹高卑之
勢皆未暇講也迄今五十餘年壬戌之秋趙公黃村來守
茲土見土城卑薄捍禦不固急欲改築惟時閩廣寇犯隣
封聖天子申飭疆域都御史周公巡按御史成公檄郡邑
遍造磚城高廣堅厚而邑宰趙適奉行之以舉大眾動大
事須合眾志始議出自富義繼更以丁糧士民胥允爰號
名遠邇經略舊制闢巖宮之隘建城隍祠於內徙南門於
縣前以表居正之體遷東門於所止以明震位之宜北門

則接於河流西門則達於清湖石甕層樓險固足恃城脚
 礪石下基四尺磚壘一丈三尺高一丈七尺濶計八尺週
 圍五百丈有奇估值有常令民與諸匠作聽從其便粟米
 棉麻之類皆以納值民無負逋工無曠缺雖用其力而不
 告勞雖用其財而不告匱歡欣鼓舞趨事赴功肇基於甲
 子之秋告成於乙丑之冬延袤百雉言言侏屹然金湯
 之固大功告就舉酒落成屬記於銘以垂不朽銘曰夫建
 城不難而不擾民為難况靖安素稱瘠土非常之原黎民
 所懼其始也人多難之乃今刻期而就迄有成功胡其能
 自適於鼓舞也哉傳曰以佚道使民雖勞不怨趙公之謂
 矣

國朝知縣李紀記略曰城垣為一方保障審圖在建置之初易
 曰王公設險以守其國有土者自不敢以戴鼉負屨踟躕
 不前也矧我

詔

朝整飭疆域首重城郭
 帑金其有官民捐建者獎異有差凡所以鞏固金湯衛我居
 民者意深遠也靖自南唐開縣環山為郭無所謂雁字馬
 迹者至明正德間華林寇發懼無守備副使吳公一貫與
 守令李萬諸公始令民築土城嘉靖間縣尹趙公輔舉舊

制而恢大之辨方正位更築磚城萬厯間鄭公煦再建
 國朝康熙雍正年來任公嘉瑞高公克藩黃公天球皆先後修

葺或派丁糧或出富義大都民自為謀而官則代為經理
 者也乾隆辛巳夏淫雨灌注四門內外崩卸四十四丈有
 奇時有進民修之議者余則曰城郭不治守土之憂也烏
 忍重勞吾民哉履勘繪圖條議以上皆報可遂捐廉四百
 餘金以復斯役不期月而屹然在望矣層樓將圯更撤而
 新之顏其上東曰紫陽西曰得勝南曰文明北曰挹繡文
 筆曬袍諸峯蜿蜒而磅礴迴溪象湖諸水清盈而映帶粉
 堞百雉烟火萬家不誠巖邑中一大觀也哉爰誌其略以
 備參攷又四門內外路記略曰周官之制九月除道農
 事畢而土工興如砥如矢無道弗不治之患禮經涂九軌
 環涂七軌野涂五軌視國門廣狹為等差我
 朝法古成憲著為令典而於道路繕修尤汲汲焉凡有守土
 之責者當仰體

國家愛民之善政為綢繆補葺之謀豈得諉諸力有不逮而

已哉靖邑環山帶水城可三里為門四內外有路為省西
 府州邑往來之衝輪蹄絡繹路久不治石盡崩坼以致高
 如陟屺低若澤陂每遇積雨成渠不堪投足行旅苦之余
 蒞政之明年節廉俸所入為士民勸而募義急公者皆後

先謹應伐石鳩工削平窪缺墁砌堅緻一律整齊易巖疆
而成坦道夫且中通溝遂宣洩積霽舉向之褰裳病涉者
悉忻然履道如夷矣路旣成嘉此邦之好義故樂得而記
之

縣丞司徒宜東門外沿城路記略曰豫章西偏建一邑曰
靖安凡官是者其將何以安之靖安城可三里爲門四環
城有路路五六尺各有差路外有城河其寬狹視路倍不
一各有差南西北三門由門而橋而左右市肆悉坦直無
阻碍因亦可久惟東門行門內東向出門卽下石級沿城
北向不數武仍東向歷石級升橋曲屈欹側不耐人意又
道通省會往來車馬不絕城河較他處復寬而深是以易
傾卸古之大橋以南廣十五尺橋以北至城隍堰皆八尺
於是城垣固行人亦稱便乙丑秋七月余下車路已半卸
城河卽欲爲募修計第視事伊始方悉力於漕政未遑及
丙寅春可矣乃夏四月北津橋燬於火農將輟耕恒山梁
公屬予偕紳士大斂費刻期復其舊路又不可兼也仲冬
一日余署邑篆將節廉俸葺之會丁卯春捐修東門南北
城各十數丈力不能繼尋亦謝縣事乃復已嗣是天益滯
雨路坍卸尤甚城河水且及城門城且日受洗盪而行人
更以病涉爲嗟月之仲夏門內外士民忽羣相議曰是必

買石成堤一勞而永逸也請之余余曰善乃以言弁簿首
募金充其費橋之南長百一十五尺深六尺外築以石中
實以土勢危危然門至橋廣十五尺之中復用石覆土上
濶二尺餘免行者陷泥塗橋之北長百餘尺行人少石亦
不可徧也輦土補其缺薄其廣并較舊址增一二尺不等
於是歲之十月一日始作以戊辰之十一月成得捐資以
兩計者將八十頗足償所出其首事人旣公而勤樂輸者
更義且勇于亦藉是以酬素願安吾民乎今路之旣成也
首事請記之遂爲之記俾勒之石以示勸且以自警云

武寧縣城唐天寶四年縣令范建殊始築歲久城圯元至

正間賊張普獻來寇無城可守官民皆爲所殘明洪武三

年知縣饒永謙因舊址築垣爲四門復圯宏治十八年知

縣毛騫卽江爲險起自由榨嘴延西而北及東計三里餘

令民均丁糧出力葺月城成覆以甃閣間以堞樓廵以冷

鋪守以機兵一時之備稱嚴正德六年知縣李梅重築廣
 七里計高一丈十五年知縣陸浚重修嘉靖間知縣葉棣
 始砌以磚周圍一千三百丈高一丈五尺厚二丈四門樓
 臺水關煥然一新 潘騰有新築城記 萬曆三年知縣胡東
 陽重修城垣弁四門臺樓門東曰迎恩西曰映輝南曰宣
 和小南門曰映川北曰拱極南少東曰通濟今塞南少西
 曰小西 陳九疇有記 崇禎十四年知縣璩伯崑奉檄修城
 令各里捐助增厚加高經兩載報竣尋燬於賊

國朝康熙三年知縣馮其世奉檄復修增敵樓石道諸加於舊
 五十五年大水自西關迤南至東關城盡圯知縣王智經

修雍正十年東門外火延燒城樓知縣吳之彥修葺乾隆十
 十一年水東門城及門樓俱圯知縣嚴左昌捐修乾隆十
 八年南門城圯知縣鄒應元捐修 余學優有記 縣志

潘騰新築城記曰大江之右彭蠡之西為南昌上游曰武
 寧武寧環山接壤楚尾城自唐築廢久逮我宏治十八年
 縣侯毛公駢復築南倚江為險北負山麓延袤東西僅二
 里餘規制初備後玩於清平堦塌不足恃正德間華林之
 亂上下皆徙去嘉靖元年江水嚙其址幅頓沒無識者憂
 之不獲為安保計嘉靖四十年吳侯思齊奉綸音修治
 四方郡縣城因白於分守參政陳公分巡僉事祝公御史
 中丞胡公狀下令修築復難之而吳以轉官去四十二年
 葉侯宰吾邑廉政之疵訪民之瘼梳剔撫摩民既感悅矣
 一日登陴顧而嘆曰嘻闕哉而不城邪脫有不虞則吾士
 民吾符籍帑藏將奚為之所哉乃同僚佐集父老謀為興
 作計請於上咸報可民相語曰吳侯廉非役其私圖者又
 曰吾侯仁非作無益舍我諸事者各驩然輸金就役期以
 亟成乃相方視址卜日而興事焉區畫精詳日夕省試殆

庶幾乎說以先民者矣地之卑者高之阻礙者闢之下隲者起之圍周七百二十丈高一丈五尺深厚八尺門闔樓臺四水關二皆肇作之無可因者其費一萬一千五百二十緡有奇經始於丙寅八月告成於丁卯九月崇墉言言望之截然民社增衛山川改觀登城之樓者恢恢燿燿驚目快心焉屹乎千里間一巨鎮矣境內外士女皆來瞻視以爲此無前績也吁何易哉初民之慘於寇溺於水也若無復以城爲念者孰意爲國憂民思患而預防有今日乎吾子若孫苟存視息於城中者寧忘所自哉司訓陳君文海適至以民不勞而大功成不可無文以垂諸後乃庠生張機徐瓚潘日章邑文學盛廷贊暨陳瑄張鏡等因予官楚便道過家索余記之余聞之禮有必隆不得而殺政有必舉不得而廢若茲城之建是也况侯之廉而仁也民素信之又從而歌頌之則上慰聖朝重民之意下垂吾鄉保障之功將麗諸竹帛而馳聲不朽豈尋常構築者倫哉顧予之言不足狀斯績姑識其略俾後之人有考焉是役也經營悉侯主之侯名棣字子儀楚興國人乙卯年鄉進士贊其事少尹曠君天榮判簿倪君湜掌史胡君濂也法皆得書

陳九疇重修武寧城記曰武寧邑城代有興廢御民者無

久寧永逸之思故其城易撓迄茲復隍崩隕靡有完繕胡侯爲令數年於城保障賴以無虞而地利人和宜兼重焉兵憲王公豫吾鎮巡是邑惟深計而預防之大造於寧侯於是得俞其請乃白守道盧公郡守周公以上達於都臺楊公均慨然有爲國爲民之意於是相高下揣厚薄仞雉堞量工費計田產而均力輸下令以致之民民懽然聽命夙夜經營是城是築卑者使高隘者使廣新四門而易其名東賓賜今日迎恩南嚮明今日宣和西慶豐今日映暉北拱辰今日拱極西南東門又附二門以通民便雉墉樓櫓駢峙壯飭巍然截然仡仡有伉經始秋仲季初訖工費金數百四旬而畢民自輸力募工公帑無與焉工闋僉爲之歌曰八月其獲城是用亟寇攘之故匪舍我穡明哲我侯我民安息又歌曰八月其獲城勤我民蠢茲寇攘震於其城隣是用亟我侯好仁是城也董之官而官不罷費輸之民而民不告病外有所嚴而莫侵內有所恃而載寧一舉而上下之心得焉余幸司鐸茲土得稔其事不可以無記侯名東陽號寧江四川建昌衛人

余學優城東楹林記曰延恩門之東郭有林曰楹林其初爲廢洲萬厯間周公道昌尹武寧審視形勢謂東郊虛曠當得叢林翼蔽以彌其缺廼令民植楹樹萬株而邑人汪

姓捐秋地數十畝以益之地廣而栽植益盛蔚然青葱雲
柯交翳環拱周衛爲一邑之勝余嘗徜徉其下與友人席
坐綠陰清風飄逸水聲潺湲夕陽斜映城郭參差追思古
人舞雩之遊隱然在目因嘆是林之成不獨固形輔勢亦
足以游衍心目舒
洩懷抱也故記

寧州城昉自唐貞元間析武寧置分寧縣建於常洲亥市

東至旌陽渡西至犀津渡南至上坑渡北至鳳凰山東西

相距四里周圍一十餘里

按舊志故土城垣
周四百八十步

明洪武三年

知州項中宣因故址築土城正德三年知州沈暕建設箭

樓十二所六年知州林文琛更築建三敵樓於東西南門

萬曆三年知州陳以忠甃之以石周圍十二里計一千一

十八丈七尺共二千三十七垛上濶八尺爲四門東曰迎

恩西曰通遠南曰廣魁北曰鳳巘又爲水門七東曰龍泉

西曰聯璧曰遺清曰崇仁南曰仁義曰青雲北曰秀水門

上立八敵樓窩舖四所

按舊志水門八其
南尚有黃甲一門

國朝康熙三年改修大塚三百有零通遠門青雲門城樓圮六

年知州徐永齡捐俸重修增建窩舖十四所十三年知州

任暄猷重修增高梁口二十五年西門譙樓火知州班衣

錦捐資修葺三十四年大水南門圮門舊制對州署有街

直出緣明萬曆三年修造石城移改南門街被佔廢甲寅

寇發知州任以守城乏人塞南門至是水衝適在南門故

地三十六年知州程起周捐修重開門接埠道又置買署

前鋪基一間欲復古制三十八年夏大水新開南門城樓
堦口又圯遂不果復自後城屢圯康熙五十五年洪水城
圯東西南三面計長五百七十七丈六尺知州祖維衡經
修乾隆二十三年知州周作哲奉文酌議修葺勸衆輸銀
共修補一百九十二丈並城樓五座城北負山無濠東西
南三面臨河爲池城北有秀水自鳳凰山來入城中繞西
由南往東而出城北立有水竇近寢沙塞舊犀角津箭樓
一所臨河畔疊石高丈許廣倍之依山留巷一條以板橫
鋪下建城門上建樓房爲一方扼要嘉靖末燬遺蹟尙存
舊協佑廟箭樓一所今廢

州志

銅鼓城州治南一百五十里武鄉二十四都明萬曆四年
因山賊哨聚流劫奉院調取鄱湖守備鄧子龍督率標兵
暨寧武奉靖新萬各州縣土兵勦平之巡撫潘季馴兵巡
僉事周思敬檄知州石漢酌議善後事宜於銅鼓石爲瀏
平新萬各州縣適中之地建設銅鼓營守備官一員州判
丁景芳奉委量度城垣周圍土築東南西三門建城三座
後巡警小樓一座

國朝雍正二年巡撫裴率度捐俸倡率檄委知州劉世豪改砌
磚石周圍共計二百六十五丈堦口三百六十七高一丈
四尺馬道濶三尺乾隆十九年署知州孟毓蕃修理東北

角外墻一段計長二丈六尺高一丈五尺

南昌故城今在南昌縣東漢置水經注南昌縣城漢高祖六年始命灌嬰以爲豫章郡此卽灌嬰所築也圖經南昌縣凡三改五移隋開皇中自郡西南徙之城北唐貞觀中徙附郡城明初又移今治城邑考漢城周十里八十四步南曰松陽門西曰皋門東北二門名以方隅爲名晉咸安中太守范甯更闢東北西北二門唐初築城之西南隅垂拱初都督李景嘉又增築之凡八門元和四年刺史韋丹更築城東北隅於是廣倍漢城宋築洪州城又倍於舊周三十里門十六紹興六年李綱帥洪州以城北歲湧江沙

截城東北隅入三里許爲十二門元因宋舊其城西面瞰江不利守禦明太祖定洪都乃命改築今城古今記漢豫章城亦曰灌嬰城在今縣東灌城鄉城隍橋西今爲黃城寺舊志城中故有子城三國吳五鳳二年太守張俊於城東城造雙關亦曰雙門南唐建爲南都俗呼雙門爲東西華門仍舊都之號也元建行省於子城內明永樂元年爲寧王府正德十四年宸濠反府廢乃闢中爲行道通行旅明一統志舊城瞰大江元末爲漢陳友諒以大艦乘水漲附城而登遂破之太祖命移城去江三十步後友諒至不能近

孫州故城在南昌縣西南唐武德五年分豫章縣地別置
南昌縣又置孫州治焉八年州縣俱廢

豐城故城在今豐城縣西南本孫吳富城縣晉改置豐城
唐徙今治顧野王輿地志後漢建安中初立富城縣於富
水之西晉太康元年改爲豐城縣移於豐水之西元和志
豐城縣北至洪州一百四十七里晉故城在今縣南四十
一里卽雷孔章得寶劍處也寰宇記縣在州西南一百三
十里故豐城豫章記云吳末時恒於此有小赤氣見於斗
牛之間占者以爲吳方興惟張華以爲不然雷煥謂寶物
精在豫章之城遂以煥爲令至縣掘獄地得龍泉太阿二

劍名勝志唐永徽初遷縣於章水東始爲今治縣志富城
故城在縣南六十里富城鄉豐城故城在縣西南劍池側
又有吳臯城在縣西赤岡山下一名黃金城今爲榮塘市
廣豐故城在豐縣東梁置寰宇記梁大通二年分豐城立
廣豐新安二縣屬巴山郡陳初廢新安入廣豐光大二年
移巴山郡於廣豐縣西二里獨瀦水南岸築立城郭隋開
皇九年廢巴山郡又併豐城縣入廣豐卽故巴山郡城也
又避諱改豐縣大業十三年林士宏毀城邑遂廢唐武德
五年復立縣志故城在縣東二十五里今爲廣豐鄉

舊志

古情城古今記在豐城東一里通志按東邱古情二城建

置始末並屬何縣未詳但據豫章古今記載錄縣志

鍾陵故城在進賢縣西北漢南昌縣之東境晉析置鍾陵縣後省梁陳時復置南史梁武帝擢郭祖深爲豫章鍾陵令又陳武帝封從子褒爲鍾陵縣侯是也隋時廢唐武德五年復置八年又廢入南昌宋改置進賢鎮崇寧二年升爲縣卽今治也又云宋時割南昌縣歸仁崇禮崇信真隱四鄉及新建縣玉溪東西二鄉置縣大觀二年復返新建二鄉而割南昌欽風鄉益之今有鍾陵市在縣東南南昌縣界又有鍾陵鄉故城蓋在今二縣界舊志

新吳故城在奉新縣西後漢置宋書州郡志豫章新吳漢

靈帝中平中立隋書地理志開皇九年併新吳入建昌唐書地理志武德五年析建昌置新吳縣八年省永淳二年復置元和志縣東至洪州一百五十里舊隸楚今新屬吳故曰新吳宋史地理志隆興府奉新唐新吳縣南唐改縣志故城今在縣西三十里唐神龍二年東徙於馮川之北卽今縣治也舊志

越王城明一統志在奉新縣西五十里相傳越王伐楚屯兵於此奉新縣志

建昌故城在奉新縣西後漢永元十六年分海昏置建安中孫策嘗以太史慈爲建昌都尉劉宋元嘉二年徙縣治

海昏而故城廢按寰宇記有太史城卽此 奉新縣志

豫章故城在武寧縣西寰宇記武寧縣在州西北三百六十里後漢建安中分海昏立西安縣晉太康元年改爲豫寧宋書王僧綽封豫寧侯卽此陳武帝立豫寧郡隋廢郡以豫寧入建昌隸洪州唐長安四年建昌置武寧景雲元年又改豫寧寶應元年以犯御名依舊爲武寧縣其故城在西二十里甘羅村唐天寶四年移於今治 舊志

按唐會要貞元十五年武寧縣民鄧廣奏武帝所隸凡二十鄉而太清鄉甘羅村縣令所治焉據此則貞元時猶治甘羅村移治當在其後非天寶時也又寰宇記別

載西安故城在分寧縣西二十里卽今寧州之西兩地相隔甚遠疑誤

西安故城寰宇記在武寧縣西二十里古今志云漢建安中置隋開皇元年廢省志按今縣之高鄉西安里卽故西安縣治也吳朱然封西安鄉侯卽此地 武寧縣志

分寧故城卽今寧州治唐會要貞元十五年武寧縣民鄧廣等奏曰縣治太清鄉西鄉趨縣餘三百里小民往返疲於道路伏見並西八鄉有常洲亥市居其中於鄉道里實爲均一請卽市建縣爲便詔可明年因建爲縣元和志分寧縣東南至洪州六百五十里刺史李吳奏分武寧西界

置因以爲名寰宇記縣本武寧之亥市其地凡十二支去武寧二百餘里

寧州志

艾縣故城在寧州西本春秋吳邑左傳哀公二十年吳公子慶忌出居於艾漢置縣屬豫章郡隋省入建昌寰宇記分寧縣有古艾城後漢劉陵豫章艾縣人州志艾城在州西百里龍岡坪故城猶在

寧州志

西平故城在寧州寰宇記在分寧縣西二百九十七里按漢書云鄧通西平人卽此縣隋省

寧州志

劉繇城豫章志劉繇城在豫章縣北四十里寰宇記在南昌縣東北三十八里蓋孫策略地曲阿攻揚州刺史劉繇

敗奔豫章築城自保今人號爲劉繇城

省志

東邱城古今記在郡下流一百四十里

省志

齊城在南昌縣東南輿地志吳大帝太元二年立孫奮爲齊王都武昌諸葛恪徙奮於豫章水經注豫章郡東南二十餘里有一城號曰齊王城蓋孫奮離宮也寰宇記在洪州東陸路二十里按三國志孫奮吳大帝第五子初立爲齊王居武昌大帝薨諸葛恪不欲諸王處濱江兵馬之地徙奮於豫章

省志

塘口城在南昌縣西南七十里梁末廣州刺史蕭勃舉兵遣其將歐陽頔傅泰等出南康趨豫章傅泰據塘口城與

周文育相持卽此或曰城在吉安府北七十里似誤塘一作躐省志

都尉城在南昌縣南三十里北與府城相連隋大業二年置三年廢南昌縣志

昌邑城在新建縣西北六十里慨口劉昭後漢志注海昏縣有昌邑城豫章記曰城東十三里江邊名慨口昌邑王賀旣廢之後宣帝封海昏侯東就國築城於此每乘海東望至此輒憤慨而還故謂之慨口寰宇記城在州北水路一百三十七里今名遊塘城新建縣志

椒邱城在新建縣北虞溥江表記孫策在椒邱遣虞翻說

華歆豫章記建安五年孫策起兵破劉勲於尋陽謀取豫

章太守華歆築此城以禦之寰宇記椒邱城在州北水路

屈曲一百四十八里名勝志去昌邑城六十里新建縣志

王步城在新建縣北水經注贛水東北逕王步側有城

云是孫奮爲齊王鎮此新建縣志

吳城在豐城縣東南三十里俗傳吳孫權祖鍾居此舊志

羅欽順有過吳城詩舟過吳城驛蒼茫暮景斜古祠淹日月生計半漁茶碧草眠黃犢青山面白沙風光長似此何處不爲家丁煒有舟回至吳城詩連朝波浪拍天浮棹入吳城見淺洲書卷半床春睡起杏花風裏放歸舟

黃中城在進賢縣南五里一名黃牛城進賢縣志

太史城在奉新寰宇記在縣西四十里後漢末太史慈創

置周廻三里西南有城角東南有盤山北枕江水其地險
固基址尙存 奉新縣志

余城寰宇記在奉新縣西十五里梁書云于慶入洪州遂
攻新吳縣余孝頃起兵拒之因築此城周三里一百五十
步 奉新縣志

倉域名勝志漢遷江東馮氏之族於海昏西里賜之田曰
馮田故其水曰馮水也馮氏倉塲故址在奉新之龍山下
山北有井井上有牆延袤數百尺俗呼倉城 奉新縣志

黃城在奉新縣西南奉新鄉野田中有平陂周圍一里相
傳宋岳飛引兵經此累土爲屯宿之所 奉新縣志

武安城在武寧縣東南十五里武安山上四面如壁其上
平坦元末邑人胡紹遠兄弟保障鄉民於此立寨亦名武
安寨 武寧縣志

南昌府志卷三終

南昌府志卷四

建置二

官署

巡撫部院署在南昌縣地方東西大街中明寧府子城內
前宮遺址也先是明正統間鎮守都御史署在東湖上貢
院之左卽故南昌道以待刷卷清軍分巡之所其堂名正
心堂西爲後樂亭後鎮守不常設署廢至嘉靖三十二年
併入貢院成化間巡撫都御史署在永寧寺鐘鼓樓之右
都御史閔珪居之正德十五年巡撫都御史王守仁以舊
院地處僻隘兩司議政亦遠於是布政司陳策按察司伍

文定合議逆濠承奉司一所地勢規模頗高廣呈奉巡撫衙門詳允卽其地建巡撫署迤北爲提學署尋奉裁巡撫署遂改爲巡按察院嘉靖十七年復設巡撫都御史胡岳卽舊提學署改建撫院公署正中爲表正堂東爲友士軒後爲虛受堂東西俱衙廨西南有清風亭演武亭儀門東爲旗纛廟又前爲院門門外兩翼爲各屬茶廳前爲雄藩節鎮坊外有屏牆坊左右爲轅門羅欽順有記

國朝巡撫仍駐節於此順治九年巡撫錦州蔡士英捐俸佐以贖鍰拓地庀材因舊而重新者四重創建者亦四重熊文舉有記陳宏緒有記康熙二十七年巡撫王隲奉

聖祖仁皇帝上諭從容安靜爲上六字製額懸供三十八年

御書老成清望匾額賜巡撫馬如龍四十二年二月

御書擁節名疆匾額賜巡撫張志棟四十六年四月

御書布澤西江匾額及政敷匡岫春風滿惠洽鄱湖澍雨多聯句
賜巡撫卽廷極五十四年

御書寵任麾鉞匾額及擁麾南國稱雄鎮開府長江控上游聯句
賜巡撫佟國勳五十六年

御書誠信開府匾額及馭吏當持法安民祇要廉金章紫綬旌循吏甘雨和風祝有年二聯賜巡撫白潢鈞摹敬懸大堂乾隆三年巡撫岳濬於內署東建升觀樓十八年巡撫鄂容

安修署前牌坊改雄藩節鎮枋為文武為憲二十八年護
巡撫湯聘建遮風樓增升觀樓為三層三十年巡撫明德
修葺大堂轅門頭門儀門東西書房三十五年巡撫海成
修理箭亭四十二年巡撫郝碩修理科房四十九年升觀
樓燬於火五十二年巡撫何裕城重建改額三星樓省志
明羅欽順記曰嘉靖十七年十月有二月甲寅望江西改建
行都察院成惟時右副都御史浦南胡公實奉璽書撫臨
茲地文武僚屬遂以日奉迎榮戟奠厥攸居百度一新興
情咸悅於是左布政使夏君邦謨按察使尹君嗣忠都指
揮僉事張君鯨與諸司官合謀宜有記述以垂久遠乃以
書來告曰江西會城舊有行都察院三所其一乃正統間
撫臣所建後為鎮守太監府其一成化間撫臣所建遭宸
濠之亂而廢其一乃正德末年撫臣所建今為行按御史
察院嘉靖初嘗罷撫臣不遣既而復置則前政所居御史
奉有成命矣時鎮守已革因即其府為行院居之爰及今

年而鎮守亦復邦謨等初聞報見公亟請所處公曰府為
鎮守舊物且嘗經奏請不可更昔人之所廢者其必有見
無容復外此將無善地乎僉曰提學之署高而顯厥且當
藩臬之中將圖改建地無善於此者署北尚多隙地移其
署而置之稍北亦罔弗宜公曰善乃興事此其興廢遷改
之本末也興事七月十一日為屋凡百餘間左為寢堂以
聽政前後皆五間中為川堂其前為儀門亦五間又前為
大門間殺其二列卒之廡間十六居吏之舍間十三栖卷
之舍間七皆附於堂寢以宴息前後亦皆五間中為角榭
庖福庫廡合十五間皆附於寢其前作亭一區以待賓客
大門之內有土神之祠外臨通衢表以棹楔中左右各一
三司之暫憩有館凡諸屬吏來俟進止者皆有所庇之廬
體勢崇嚴品式具備所用木石瓦甃韋鐵竹葦丹漆之類
費金凡二千五百有奇人夫匠作為力凡二萬一千有奇
金取諸贖刑之餘力均諸里役與卒之羨者公明無遺照
指授規畫動適幾宜故歷日僅百五十有奇遂克臻於完
美役鉅而費省功倍而民不勞此則今茲勦造之凡也願
得一言以鐫諸石庶永承有徵先生宜勿拒欽順不敏竊
觀公之是舉有三善焉其待物也公其決幾也果其用財
也節蓋凡爾給庶務鮮不由此是宜風紀振肅大小歸心

嘉績之成如種斯獲其於聖天子倚任之重諒無負哉諸君謀議克諧贊襄有恪皆所以爲一方久遠之計協恭之美又於是乎在皆所宜書公名岳字仲申華亭人

國朝熊文舉記曰
今上親政之次年歲在壬辰少司馬大中丞蔡公以特簡開府江西閱兩年政治肅清賦蠲而核吏潔而和兵整而恬

民安而阜上下雍睦四境喁喁山高水深陶然化國先是都察院有公署疊經變亂苟且相仍等於蘧廬莫之葺治大中丞至或寓紳士之居鼓角雖嚴規模不立公見之曰是柏臺也總持風紀貞肅官僚皆於是乎在何至窳陋若此會江西盤錯沓乘諸艱蝟集公日拮据焦勞吏治民隱不暇甲午春公始率藩臬諸大夫郡邑有司戎幕參遊相度舊行臺升高望遠俯勝測奇撤其壅蔽斥其菲陋廓其湫隘規方審勢一切鼎而新之有門鏘鏘有堂翼翼其後有川堂有燕寢計再重備極高明整潔後有樓巍然厥豁憑欄四眺覽矚無遺旁及射圃庖湑之所罔不周隆外而事神寅賓之堂俱歸整肅計所用木石竹葦劈鍊丹漆及雇募人夫匠作等約費金數千有奇皆公自捐俸薪贖金纖毫不擾於民間負擔不呼之力役公復指示有方區畫有緒故爲時僅百有餘日遂臻厥成壯哉觀也不佞文

舉蓋嘗遊覽縱步而歎大中丞之爲此也有四美焉以言乎天時則適當營建之候湖東西巨孽就殄七八年適賦全蠲桴鼓無驚謳歌載道以言乎地利舊旣當藩臬之中新復闢四道之路後屏不苦於局促兩翼遂覺其檐如以言乎其物曲則美材在遠而畢集文石擇近而咸齊捷若神輸敏如夙構以言乎人情共覆肩乎仁天快瞻依乎德宇無煩馨鼓爭效揅陬夫君子一舉事而四美俱備是不惟可法兼亦可傳吾慶江右之民公且將盡納之春臺登之衽席是役也公不獨享其攸躋攸寧而與江民共適於美輪美奐吾見堂階之下其願稱兕觥而祝萬壽者恨不踵相接也諸藩臬大夫郡邑有司稟公法程奉公憲度登斯堂也蓋豸府驄威之凜凜焉夫吏治肅民生安公本此以制作經營實垂不朽文舉席庇蜚鴻歡同賀燕以祭戎趙君業隆遵董斯役請文鐫石因不揣蕪鄙樂得次第而紀載之蔡公名士英遼東錦州人以都察院協理院事左副都御史陞兵部右侍郎都察院左副都御史巡撫江西陳宏緒觀德堂記曰少司馬錦州蔡公奉命撫綏江右載閱寒暑仁以樂育義以匡定禮以勸誘濯磨而本之以中孚出之以澹哲諸所創制垂法悉爲無窮之規十

命撫綏

膏澤雨暘時若庶草蕃庶羣抃舞而歌大有於郊原於是
公進諸大夫而詔之曰是百堵具興之日也乃相舊基而
增拓之捐清俸暨贖緩凡數千金不煩列屬不擾閭閻俄
頃而工師告成殖殖噲噲若昔人所詠者靡不兼備復於
公署之西卽演武亭故址而益加廣繚以周垣爲韎韐附
注與材官騎卒校射之堂顏其堂曰觀德公時輕裘緩帶
訓於其間恩威所被遐邇懾服未幾總督漕儲需人在廷
以三大臣列名奏請

特簡公

昇以重任僉曰公之宏猷駿望無難於艱危之江右則益
無難於漕儲也公既叱馭有期諸紳士以迨億兆或謀築
室肖像或謀摩崖鐫功或謀颺言頌德而公環顧校射之
場不忘夙昔鼓鞀之聽屬中權趙君命小子宏緒爲之記
宏緒作而歎曰大哉公之名斯堂也語有之德成而上藝
成而下昔之人張鵠設乏有其度大侯參干有其程司士
司正量人樂人有其官執弓挾矢見鏃鈎弦有其法決遂
旌福中籌豐爵有其器奇純左右有其筭若是者豈徒以
藝相角逐而已哉將導之進退周旋俾其咸中於禮約之
於內志正外體直俾其勿以悍勇而見其長也孔子射於
矍相之圃觀者如堵牆子路執弓矢延之而去之者半公
罔之裘揚解語之而去者又半序點又揚解而語之僅有

存者射之難也如是非射之難而觀德於射之難也然則
公之命名之意遠矣江右固處弱勢賴公訓練而一變爲
強又賴公訓練而強者一變而不屑以悍勇見長咸中於
禮今行於國中所遇執鞭弭而屬橐鞬者有揖讓之容無
囂凌詬誶之習有稱物平施之雅無搶攘爭奪之風則公
之德化實使之習有稱物平施之雅無搶攘爭奪之風則公
高水長細柳之營何異蔽芾之樹記之以示勿諼也
明巡撫夏良勝題名記曰國家所稱持綱肅紀提衡大小
文武吏惠養元元遏亂略以保固疆圉則撫臣重大江以
西控吳楚閩越之衝彈壓諸郡國盤石宗城而襄治安以
視他藩省則又重按令甲以工部侍郎巡視自文皇帝十
九年始成宣而後或鎮或撫幸隆其任與巡按御史相錯
制世宗六年始定設又四十年而始兼軍務一切錢穀兵
甲訟獄舉刺興除聽便宜具文而權益重今上御世三十
一年遡成宣歷二百餘載其以御史中丞及部臣鎮守者
若而人以部臣卿寺巡視者若而人以都御史大夫及御
史中丞兼理軍務者若而人其邑里仕宦久近官爵贈諡
所至詳莆田林公碑及姑熟徐公鐫記中凡六十六人稱
重臣等也夫魯道齊法蕭規曹隨余濫爲之後能不畫一
奉之竊謂在昔功忠彪炳寓內者無如文成王公忠烈孫

公夫以死勤事以勞定國人臣事君之上物也然豈兩公所欲哉功以迫而後起名以相持而後成周公破斧東征豈其得已彼脯戶綢繆固公所為周室奠八百年基業免國家於予侮者也自兩公外余不能悉舉舉所覩記者若韓襄毅以奏奪護衛稱林司寇以議滅廩祿稱韓莊僖以止遣中官罷徵陶器稱張襄惠胡莊肅陳恭介以殲緝萑蒲救災蠲賑稱雖人人殊均無失其所為脯戶綢繆計兩公先後相輝映寧少遜哉何也撫之為言拊也時乎政理海內無事為之昭德畜威輯和鎮靜以消邪萌不幸有大危疑大患害眾人相顧矍矍無可柰何為之辛酸百慮呼吸萬變而平定其傾兩者並重要以因時附眾歸之拊循譬之撫摩羣兒痒痲疾痛總適於安故諸公文武剛柔不同用其先事而戒臨事而任惠養元元而固疆圉用圖治安所為國家重一也主上神聖坐理江右諸郡國吏奉職士奉訓庶民徵輸轉餉惟恐後無悍宗強寇狡焉不逞之徒伏釁眉睫不可謂之有事然而中貴人礦金樵木開採權稅之使十道四出焚林竭澤而意不贍吏民歎息愁苦之氣所在而有詎得泄泄然謂天下無事余材能遜中庸竭區區血心拮据從事斤斤酌損之而無救於時事之一有如值逆藩羣盜之會為文成忠烈力當其衝轉檉机

而盤石必退三十里避舍不然仰而視莊僖莊肅恭介諸公或不敢望項背而進則安所為重稱天子撫臣後六十八人起也語不云乎名者實之賓君子疾沒世而名不稱焉况為天子當一面其所措置前事之師覆車之戒不啻懸鑑而列眉可畏哉彼卑官小吏一方一職智効力殫猶足免於素餐汗顏之譏吾見重之難為而名下之未易副也余輒不自揆再為勒石以記而綴名其末以志慕也若夫名副其實紹諸公芳矩則俟後之君子

國朝巡撫宋犖題名碑記曰司馬溫公作諫院題名記有曰某也忠某也佞某也直某也詐後之人將歷指其名而數之可不畏哉是知題名者所以誌景行垂鑒戒非徒侈名氏於豐碑也巡撫都御史於明宣德間始有專官江西行臺題名凡有二自賈公諒以下六十六人為一石則有見素林公為之記益以夏公良勝十七人為一石則夏公自為之記而

國朝諸賢闕焉未備余稽之誌載詳其爵里自李公翔鳳至不佞犖止凡十五人勒之貞珉列於廳事之左歷觀前載自建官之始終明之世合八十餘人其間如韓襄毅林貞肅孫忠烈王文成諸公或臨難不苟或戡平大亂皆忠貞果毅事業彪炳至今猶在人耳目餘則或存或亡有知有不

知者矣我
國家應運興隆

今天子繼體立極凡大臣秉鉞而來者靡不推誠置腹假以便宜
其一時治狀父老類能道之茲可無述余之前即今大司
農福山王公蒞事甫旬有四日隨遷閩總制而去然其風
裁峻整宏綱畢舉余一循其成法而酌以時宜略加損益
夙夜兢兢三載於茲矣夫觀在事之歲時考政事之得失
則其人之賢不肖可坐而得矣且三復司馬公之言尤畏
夫後人指名而數之也敢不勉哉

撫標中軍署在南昌縣地方按察司署後大街縣志

提督學政署在南昌縣地方按察司署東即舊副使道署

康熙四十六年特差四川道監察御史楊顥提督江西學

政因改建為院署乾隆二十二年督學張映辰重修二十

八年督學周煌修理考棚及大堂東西書房三十六年督

學汪廷璵修理辦公書房及書廂房庫房科房稿房三十

八年督學曹文植倡建考棚十四重自有記彭元瑞趙開

元張華甫皆有記 四十一年督學蔣元益修理大堂川堂

宅門花廳四十四年督學汪永錫修理內署三堂宅門花

廳廚房捲篷四十八年督學胡高望書福建學政汪薇聯

句爾無文字休言命我有兒孫要讀書於大堂省志新增

學政曹文植記曰

國家賓興之典以三載為期而三載之中則各有學使者先
為之造就而甄拔之故學使者之習於諸生也最久而其
為任亦最專且重膺斯任者豈可以一事或苟乎哉顧有
力所能為者有力所不能為者端士習整文風俾入吾庠
序者悉通經學古之彥而不許虛浮佻巧得以溷於其中
此則力所能為也若夫欲為其地興利除弊而必出於建
造之勞且其建造也可以使之不費官帑不延歲月並不

致有勞夫上之人而羣自忻忻然而赴公家之義此即事
果益於學政亦必出於吾庠序士樂善之誠倡以諸大吏
鼓舞作興之治化而學使者亦何力之有雖然前此既有
志未逮矣而今學使者適會其成功焉則目覩而樂之亦
固其所乾隆三十有六年辛卯九月予自粵東主試還即
奉

命視學江西江西固人文淵藪而南昌為江西省會地宜人才
視他郡較夥校士之院宇亦宜視他郡較寬比行歲試事
則南昌新建兩邑之與試者合而肩之號舍不能容往往
學使者皆移試貢院中予性苦迂謹以舊例不得不然而
而屆期於書隸之防閑伺察之周密則亦視他郡勞瘁倍
之矣先是試院東南隅有文昌閣閣後觀音堂偏處號舍
外餘悉民地後又臬司署射圃事有苦於無可基而遂無
可為力者非此之謂乎而臬使歐陽公則已慨然欲以射
圃之餘地為茲事倡而中丞海公及方伯李公因慫恿而
玉成之為南昌紳士鼓於是諸生踴躍喜其基之漸可拓
也遂上請於各大憲及予以始事告而各邑以數百金輸
者踵相接矣射圃前為民地之有主者皆受價值而讓諸
公矣即福廟之偏而處者已撤而徙之前矣時予正按試
贛州南安各郡而諸生始事之人不遠千里而起工之日

時木石之多少以至間架門徑之尺寸向背無不一一欲
使予知且欲予指示方略必斟酌盡善而後已予故不敢
以遙揣臆度者為越俎之謀而諸生既能善承各上憲之
意而勇於趨公如此則豈尚有苟且以從事者乎予惟拱
手以俟其落成而紀之以文為諸生誦美於勿諉是又予
力之所能為者耳未幾諸生構佳石以請予記事之言予
乃進諸生而勉之曰夫事不患乎不成患志之不立力不
患乎不足患心之不專志果立心果專即聖賢不難以馴
至而况區區土木之功乎哉以百餘年無所憑藉之事而
一旦忽有其幾遂可不半載而底於成又况諸生事業文
章有鄉先輩以為憑藉而專心致志其成也益易為功矣
諸生勉乎哉繼今以後諸主果能充其所學而更擴而新
之以上副

國家求賢之典則豈徒試院之煥然一新已哉學使者亦與
有光榮也已為記

彭元瑞增建南昌試院碑記曰江西十三郡南昌為治所
提督學院駐焉八邑之士試於茲闔省諸生錄遺於茲自
予試童子以來三十餘年未聞修治而新定合甲倚郭之
二縣同日試以杜兩籍於是南昌新建之士四千餘人試
院不能容則引而之貢院地大稽察難周未竣事而出署

官與士兩以為非宜學士新安曹公持節是邦慨然謀所以擴之八邑之人仰承德意庀工飭材踴躍爭赴廉使歐陽公割射圃以益其基復購民居之隣院者得地廣十八丈表十七丈有奇葺舊益新四千餘席高明爽塏堅密靜深橐筆人士咸忭以奮走書相告徵文紀德憶乾隆三十三年秋九月

大駕秋彌回子與公同直

中禁聯鑣迓

蹕於南石槽適副相汪公初奉江西督學之命於班列中俯詢利弊敬以是告時公端坐重默不置一言越

三年而膺茲任遂有是役夫集思廣益宰相之事也不動聲色舉而措之社稷之臣也方公聞言時旁之人未嘗知

公受之於耳而公未必自以為識之於心乃一當其職而道路之間參坐之頃一席之談三年之久立能見諸行事

特達之知它日必且為相以此用天下之人才聽納天下之言豈徒一學使之任一試院之建其為事業可推暨而前券

也予與公共事久辱一人之交三年中不遣子弟歸試而以予言之足備公采擇而不以人廢為可幸既頌公德且

諭鄉人士曰道若大路學在多聞必下帷執卷而後讀書

非善學也賈山曰學問至於蕩蕩求善無厭也諸君能體公之為政者以為學則進德修業之塗行止坐臥隨處皆

充滿洋溢之區也諸生勉乎哉趙開元奉新縣中書蔡元度獨捐增建南昌試院碑記曰

國家化理隆洽文教覃敷百數十年海內士庶自其先世鼓篋遜業沐浴詠歌蒸蒸向風蓋善氣之積而慕義之誠其

所漸摩濡染非一時之效所能為矣南昌府屬試院號舍舊隘不宏時當陰雨上漏下濕暑月則炎氣逼蒸竟日不

能舒肱余在諸生中應試時其苦况已備嘗之矣歲辛卯右庶子新安曹公奉

簡命視學江右歲試校士時思有以擴大而新之先是撫軍海公方伯李公觀察歐陽公詢謀僉同以故歐陽公慨然撥

署內射圃餘地成其美於是鳩工庀材固基址高垣墉勤樸斲施丹雘自壬辰冬迄癸巳夏工力之費各視所隸弟

子員之數哀金公舉分貲獨任刻期而集以歲事蓋諸君子沐

聖化久共切觀光樂為赴義其哀金者可與其獨任者則尤可尚也夫即一事以驗士氣之盛即一郡一邑以徵風被之

遠其所由來豈一時一人之故哉余邑蔡中翰元度不吝千金獨捐一邑之費規畫詳備始終不懈厥功偉矣事既

竣邑人多其義寓書於京屬予記其事於所分修之壁余不得而辭也余憶幼時見其封翁損齋公邃於經術能詩多善行遺命歲修葺邑中文廟數十年丹雘如新載諸邑乘而中翰復能繼其志樹德於文教之地是可嘉也余向所謂善氣之積慕義之誠漸摩濡染之已久者其在斯歟抑是舉也非曹公念多士之苦孰倡其事於前非歐陽公成曹公之志孰董其事於後余固嘉蔡君能盡吾邑之美而益敬諸上憲能倡闔郡之美是為記

張華甫武寧縣與修南昌試院記曰事之出大人先生力者士趨之民緩之其力不至士趨之民趨之近者趨之遠者玩焉其力亦不至士趨之民趨之遠近應之邑大者易之小者難焉其力有至有不至然則大人先生之力出而與邑之大小遠近士民無不至焉蓋亦非易也武寧距南昌二百里許邑遠而小應童子試者不下千人恭遇文宗新安曹公視學南昌覽東西廡耳舍慨然曰隘矣爾多士將焉處此於是諸生以增修之議上書閣下公口指手畫定為楷模觀察歐陽公拓以地方伯李公中丞海公總以成我文宗曹公寵以記區區武邑又何言焉然武屬古艾城修水上下縈紆數百里唐宋以來鄭堂柳舍山水文章之盛不以地僻而遠邑小而巖為同郡諸君子所不齒而

甫濫邀

聖天子眷顧備職司刑適丁外艱竊聞南郡士舍既成且速多士權訢鼓舞角力文壘以仰答諸大人儲才之意甫獨不能一詣洪州為吾武謝為諸大人賀為可愧也顧猶幸武邑遠且小為士民者霍然起而應之輸四百緡鄉城無難色趨事者又復勤勤懇懇不負大人先生之力為郡縣出而各出其力相與有成如此也故記

布政使司署在新建縣地方章江門內即明初南昌府署也司治舊在子城內宋隆興府元行中書省故址永樂元年以其地剏寧府遷司治於今處宣德四年布政使孟桓重修正統九年布政使吳潤充拓甬道護以石欄樹承流宣化二坊於門外左右成化十二年布政使王克復剏築東樓以配章江門城樓東南街口匾曰藩鎮坊正德八年

十二月火左布政張嶺通志作頂重修十年右叅政陳洪謨署

印乃畢工正堂五間後堂七間名後樂堂堂前為川堂名

紫薇樓左右為翼室十五年左右布政陳策重建譙樓嘉靖

三年陳洪謨為布政重建薇垣牌坊三十三年右布政潘

恩顏其東樓曰攬秀樓萬曆間布政使陳文燭重修紫薇

樓自有記後攬秀樓圯布政使陸長庚重建明末燬

國朝順治六年布政使盧震陽建葺康熙初布政使余應魁重

建大堂旁為經歷司照磨所理問所及司獄所都事檢校

廨後司獄照磨都事檢校并裁廣濟庫在紫薇樓右時憲

書庫在後樂堂右乾隆八年六月東樓燬布政使彭家屏

復建顏曰高觀樓并復藩鎮坊顏曰西江保障三十三年

高觀樓燬布政使揆義重建顏曰江天樓四十二年署布

政使周克開重修頭門省志 據册新增

按舊志黃冊庫在永和門內花街巷前明舊庫天順八

年因城東故錢局地創立至宏治六年重修織染局在

府學東鑄錢局在東湖南二局久廢新錢局在司署後

僕家塘

明陳文燭修紫薇樓記曰紫薇省即古中書省也改自唐

開元而武德間置行臺尚書省於諸道馬端臨以為虞廷

出入帝命周官掌王八柄內外之職同也明興始因元制
置江西行中書省設左右丞尋改為布政使司國初建樓
紫薇蓋取中書省之意也嘉靖閒吾鄉大司空傅公頤為
左使修之萬曆以來傾圯日甚左使仁和宋公議修而不

佞至少參義烏龔公力贊焉兩臺允帑金百餘閱月而工成美輪美奐督之者理問殷哲也南昌名都其勝在西山長江而樓倚西郭銜山吞江浩蕩無際東如文筆塔北如彭貞觀一瞬目而盡南有攬秀辨章二樓若左右翼晴登之則朱光靈景在樓矣雨登之則風帆烟艇在樓矣月登之則金波玉鉤在樓矣雪登之則瓊樹瑤階在樓矣大都景以西勝云夫王者承天而布之民故曰王省惟歲卿士惟月師尹惟日主上端居九五登樓北望邈若萬里歲屢大禋詔下賑貸其仁如天卿士師尹無能宣布萬一登斯樓也可以觀省矣遂書而饒於石

按察使司署在南昌縣地方撫院東即宋漕臺院元廉訪使故址也宋轉運使治所舊在城東北紹興四年張澄改建於子城東為漕臺即今處元至元十五年改為肅政廉訪使署至順二年廉訪使高納麟重修至正四年副憲脫脫作新門虞集有記明洪武乙巳始改為江西等處提刑

按察使司按察使傅獻創建宣德二年按察使童寅重修儀門三間左右門房各五間前屏門墻左闢行道面南為正門門內左為海棠祠堂後為川堂川堂後為堂五間曰百鑑堂東西夾室二間堂之東西皆有齋戒堂正德十四年宸濠平按察使伍文定復拓而新之

國朝順治五年毀於兵按察使李長春重建

有題名碑記康熙

初按察使婁布吳重建大堂九年按察使蘇銑重建寅賓館旁為經歷司照磨所知事司獄司廨雍正二年照磨裁乾隆初按察司凌燾增署後遮風樓為五間改建三堂左偏節樓為爽樓樓東涵月亭并重葺之又建東軒連楹為

慕朱齋軒後藝竹樹旁濬池通以略約皆退食之所也乾隆三十三年按察使佛德重修大堂三十五年署按察使歐陽永琦重修二堂川堂省志 據册新增

元虞集作新門記略曰昔世祖皇帝置御史臺領邦憲分道實使其在江西湖東者總治於豫章於政事無所不得殆非分土列職效一官領一事者之比也至元二十八年以肅政廉訪易提刑按察之名然其聽政之堂府史之舍文書圖籍之儲門垣之設悉因其舊以時完葺而無改焉元統元年癸酉普顏公監憲也以為外門前臨行道與儀門相值而不相遠無以致嚴密尊重之體度其東若干步更置門焉以舊門之地為庫所部有簠簋不飾之懲者則度焉以示戒其為門也樹兩楹設兩扉限以中闌而已無風雨之蔽居十三年而木多朽至正四年中順大夫寧夏脫脫自行中書省郎中來副憲事觀於門而歎曰是可以一日不葺乎行道憧憧幾與齊民為比屋何可無所表異規作新門如儀門之制命有司度材擇工而從事焉乃於八月二十有一日工役就序次年二月大中大夫張掖劉

公沙刺班以監憲乃梓人告具明年正月九日甲午定柱石越十有四日丁未升梁棟而作焉公親率僚佐蒞之自行省以下郡縣百司咸集祝史陳辭神人胥洽工不待勸翕然奉能又七日癸丑中順大夫河內李公守仁以憲使至與二公志同道合無間然幕府贊之者則經歷司君允德知事張君汝遴照磨高君克明也五月六日丁巳門成既而中順大夫張公珪來僉憲事門之為屋基崇於地三尺五寸極崇於基三十又三尺南北之深四十尺東西之廣如其深而贏二尺鍊石木瓦丹蘄工徒之用出郡之經費中統鈔一百三十有五錠門左右為崇墉高十有六尺八寸長十有六丈厚稱之其費中統鈔八十有五錠則憲司工膳之所節也董其役者憲使元翁阿里沙以有司治役者南昌簿陸某也憲府以集昔嘗待罪國史僑其部內之野而老焉惟有文學之好乃命佐書黃鐘持書幣來請記其事如此云

李長春題名碑記略曰自唐置觀察使宋因之而加以提刑之名前彷彿其制設按察使職專糾察平反而更設副使僉事或統轄驛傳或提督學政或分治兵巡

國朝制度率由舊章均之皆昇以祥刑之寄者也然則司憲者教與養皆分內事豈僅以聽斷得情之為愉快哉江右天

南重鎮夙號易治自戊子己丑之變城郭榛莽廬井邱墟
余頃奉命陳臬覩其化僑辛苦惕然憂之念新國用輕典
古有明訓每遇金木之訊祇凜無敢縱濫而智識黥淺恒
抱縷短汲深之懼寅恭啓廸惟二三僚案是賴甲午余叨
量移值重修臬署告竣而題名久缺未備諸僚案咸以為
言竊意兵燹之餘文獻無徵前此姓氏既若存若亡乃開
國十載以來創始諸人亦僅沒而不傳非所以崇昭代示
維新也因磨礱片石而次第記之至於刑措教敷俟後之
膺是任者

督糧道署舊在德勝門集仙坊明正德中參議陸溥建嘉

靖二十年象山王挺蒞任另建於九江道之東羅洪先有

糧儲道分司記後廢今移裁缺右布政使舊署雍正二年

添設庫大使七年督糧道高銳改門自有記乾隆八年副

使周人龍以所居偏仄非制就署西偏添建大堂二堂頭

門儀門并庫大使廨亦添建焉規模乃備省志 據册新

增

羅洪先糧儲道分司記曰國家賦仰給東南計天下所入
江以南得什之六而江西視天下居什一焉其土地狹而
薄東西南距嶺川洩其北無平原瀦蓄高田仰澤於雨雨
久川輒泛溢故水旱之報無虛歲農民四時勤苦僅足食
而不能滿一歲而賦入去其強半故富家思厚藏必詭法
自便而老胥則亂版籍得出入丁稅以罔機利或阡陌連
數里其稅不踰於畸人貧而愚者既無以自食又多陰代
富家逋稅官司莫能原其來由祇據籍征斂惟後時之誅
每下令又為猾獍取持廣其羨目長其時直逞不肖之心
而以賂相逐蓋十三府一州七十三縣皆然也而自府以
下又各有分部常不下百十人省以一人督率之其耳目
必有所不逮故民不困於賦者蓋亦什一而省中督率之
勞視他司訟獄亦當十之六焉非有惻怛子諒之心剛果
明敏之材變通輕重之術然且早作而夜思人謀而利制
固未可辨此使復為出入之防關上下之情則督率雖宜
未足以為惠也正德間參議陸君原博始建糧儲分司於

集仙坊蓋因沒產爲之其地湫溢無以容衆其制寢陋不能嚴出入其道路紆僻吏民之奔命赴訴者不便嘉靖庚子冬象山王君子長自工部擢是職明年秋至官既數月則建稅役儲蓄二議以布已意又數月因吏民之情以分司署請於臺使盡貿其故業益以贖金擇九江道之東公地之隙爲屋凡若干楹而廳事燕休庖寢憩藏之所靡有不備前爲重門四周爲崇墉視他署之崇嚴相等而又相連比吏之抱牘以進者堂序有嚴民之環屏而候命令者日以不廢經始於壬寅二月而告成蓋將於是旣其心盡其才然其變通以宜民者亦可槩見其什一矣夫民忍飢渴奔走以受聽斷一日之淹猶爲念也而况偪抑以陷穽慘毒於股削者不尤足悲矣乎吏之竊符僞章目逆而頤指猶足爲禍福也而况習故以舞文懷墨以攘奪者不尤當察矣乎數月之閒耳目所逮有不利者雖舉羸役衆猶若不容緩也又况加以歲年凡耳目所未及其關係尤重且大者將不次第徧舉矣乎王君爲工部與聞朝廷財賦之議常憂以天下固不獨江西之民然甦東南之困以培國家之命宜自江西始故因記是役也附以見聞而必有望焉

高銳記曰國計莫切於糧務官箴甚重於關防我

皇上澄清吏治薄海內外視同几席固已大臣法小臣廉百官得其宜萬事得其序矣雍正七年七月吏部行文以藩司爲一省承流宣化之大員出納錢糧甄別賢否責任尤重宜照臬司衙門例一體封鎖關防江西即日奉行而督糧道署舊在布政司儀門之內本右布政使奉裁移駐其署歷有年所矣今布政使奉文關防而糧道有督運徵漕之責江西禾稼登場早晚不同十三府七十八州縣輸將遲速不一飛書徵召持籌按驗晨夕不遑若仍前與布政司同門出入是封鎖關防之義不符而漕務或有誤也銳以六年之秋由廣信知府奉

特簡陞任督糧道遂度儀門之外大門之內循右而行設以柵欄隔以周垣甃石爲路重門深進工匠之役木植磚石丹堊之費皆自捐養廉凡二百四十餘金興工於七年十月初七日至二十六日告竣伏念銳世受國恩先大夫督學江西教澤在人心近五十年學士縉紳猶能服習傳誦思慕無已銳前之任廣信恭請

聖訓蒙

皇上召見

天語諄諄勅以潔身奉職銳敢不夙夜勤慎矢忠矢孝以仰承皇上教育之恩無致隕越以遺先大夫餘憾受任以來恪遵上憲

明飭督率州縣一切漕務陋規浮收耗羨諸弊禁革靡遺每歲二月送漕過淮幸無缺兌祇供厥職不敢言勞屢蒙

恩議敘九年五月又蒙

允題兼巡南昌撫州建昌三府從此督糧道署兼有地方之責矣

皆出

皇上不次隆恩上憲鼓勵作養至意謹附識於此夫衙署關防謹飭官方之要道也小心殫力臣子奉職之常分也宜識年月用垂永久以示勿忘是為記

鹽法道署在按察司大門內西偏建置年分無可稽考乾隆三十二年鹽法道塘琦請支鹽庫匣費修造大門三間大堂五間堂東一間為銀庫西一間為外銀庫又增建東西廂三間三十六年鹽法道劉墉重修署前東西坊三十七年又修住房養和堂及署外承差房三十八年鹽法道

李源重修西南兩書房并增建住房箭亭四十年又修署後正樓配樓又修署南關帝殿觀音堂四十一年鹽法道吳山鳳重修署外官廳四十五年鹽法道杜憲增置署西民人屋以拓署基又署前舊有知事署一區自二十二年裁南昌縣南浦驛歸併知事兼管南浦驛即移駐城外南浦驛署鹽法道興德捐買知事署舊基歸併道署增建房屋 據冊新增

南瑞總兵署在南昌縣地方廣潤門內萬壽宮西北本察院舊署明嘉靖中以巡撫衙門改為察院正中太微堂後為端本堂

國朝順治十八年察院奉裁後改為南瑞總兵官署省志

鎮標中軍署在南昌縣地方惠民門倉巷口即舊都指揮

使司署雍正二年奉裁都指揮始改今署省志

按省志載有都指揮司舊署在省城中文錦局舊址明

洪武初都指揮使宋晟等創造天順五年都指揮同知

王貴重修旁有經歷司斷事司今俱廢

南昌府署在新建縣地方舊在司馬巷即新建縣舊治漢

晉豫章郡署在城南有子城東西雙闕門唐洪州為都督

觀察節度使治所宋仍州置鎮南軍後陞為隆興府太平

興國中郡守張繼則重修施元長書名揭於中門之楣楊

傑有記

元仍宋舊基改為行中書省移隆興路署於章江

門內南昌縣在其左新建縣在其右又左為錄事司明洪

武三年知府趙文奎併司府二縣地重建永樂元年改為

布政司治遷府治於今處正統元年知府任肅復新之宏

治十二年知府祝瀚因卑隘鼎新之張元禎有種德堂記

萬曆七年知府周良臣重修自有記十三年知府范涑建

公府齋居於署內自有記三十四年前後堂庫燬知府盧

廷選復建劉一燦有記

國朝順治五年燬於寇知府羅長元及郡僚皆寓居民舍康熙

二年知府葉丹重建十六年知府甘國棟擴大之乾隆四

年六科吏舍圯知府吳同仁重修十年知府李倓重修遮
風樓及廂房三十四年知府汪鍾修葺頭門儀門東西班
房兩廊科房大堂宅門二堂三十八年知府錢策重修三
堂東西廂房遮風樓東書房未葺事改官知府許蔭楷續
修增建西書房三間四十八年知府黃良棟借廉修葺舊
志 據冊新增

宋楊傑記曰今天子卽位元年春三月己巳洪州初以州
名表於門何以書重正名也豫章之水原於虔化會貢水
而爲贛東北至於洪崖之陽漢置郡曰豫章因水名也易
郡曰洪州因山名也唐治軍建節曰鎮南制遠俗也僞唐
僭稱南都避中原而北遷也宋削平僭僞聲教被於四海
州名從隋仍舊貫也鎮名從唐存武略也鎮名則有節度
使以領之州名則觀察團練刺史以鎮之是二者之名不
可闕其一也而鎮南之名固已表於府門矣惟州名則闕

然未之表也兵部施公出守是邦以德義鎮俗事爲有本
乃命以州名表於中門表之所以正名也正名不可不書
故書之

明張元禎種德堂記曰南昌舊有獄在郡治左圍牆僅一
畝積繫至千餘人校者繆者縲者萃者桎者跂惟容趾蚘
嚼膚蟻噬血恣其腹滿而去牛之梏者麤食其角疾之危
者豎入其育刑未至極年已盡算民罹此酷數十年於今
矣山陰祝侯以宏治丁巳來守於茲慨念而深矜之訟牒
之所訴者斷訖遣去不令入狴羸獄吏固固常爲一空然
廷臣之鎮巡總治於茲方岳之奠服統治於茲十三郡之
有訟事者俱集於茲株連根引實繁有徒南昌之獄難乎
其畫地矣侯相府治南有舊老子宮買地貿之遂因其地
作屋以楹計者如干築牆以雉者如干前創大門中起巨
堂顏曰種德取臯陶邁種乃降之義審出不服者來宅焉
時巡按御史王聞之曰弭災致和莫甚於此夫於災能弭
而後和可致警種田然稂莠旣芟嘉禾自植德之種也何
莫不然獄成於今年冬半不閱月大雪民占有年侯曰雪
則瑞矣其如獄民之寒瘦何躬詣舊獄新獄計口給薪米
解縱青災至二百餘人得釋者如脫焚出溺熙熙然父子
兄弟相慶於道侯眞所謂種德者哉後之居是堂者尙體

侯心以種德為事若馬其口孔其項以是而求臯陶謂之種德則未矣必教於是弼中於是協執頑叟服頑苗俾一人有慶四方風動然後於德為能種焉甫刑曰監於茲祥刑謹以是為種德堂告

知府周良臣記曰南昌故漢豫章郡也國初稱洪都尋倣唐制建會省稱南昌府云所統為州縣者八儒學倉庫驛遞巡泊者五十有八編戶三十萬科糧五十萬山川文獻名物之盛甲天下蓋宇內雄郡也獨府治卑庠不稱往制攷自洪武三年郡守趙公文即唐觀察使治所益以州邑故址構章江之東永樂改元寧藩南遷乞封時不假圖遂移布政司於府治府則就新建治所為之宏治閒郡守任公肅治葺率務省便莫軌於度迄今越七十禩欹朽日益滋每視事輒聞蠹蝕聲潰蜚蜚若也咸謂不葺且大頽余亦時時語僚佐謀新之顧深計而中輟迺萬曆乙亥歲夏四月十有四日俄聞西北兩楹傾聲甚迅人馬辟易會余方理牘燕厦胥徒各就廨莫有罹者然三楹亦撓榱折岌岌且盡棟頽矣不獲已爰白諸司報口可翼日余率僚佐達觀故宇程物宜覈因革檄南新二縣令林應訓詹沂校經費書餼糧鳩徒庸越七日庚寅用牲於司空昭升經營乃屬知事李綸照磨周書督津吏輸材木屬經歷童養浩

檢校李如桃具畚揭紀功實屬縣丞胡慶錫史守中庀器具佐將作委輸責之縣正汰浮淫也稽閱總之在己虞媿妖也卷石塊礫寸薪尺朽咸有主者防漁蠹也材礪鍛磚塋甃膠采公市平估懸格臚列慮侵擾也縮溢伸乏辨材程能樽勞節力獎勤振惰百司執事各辨其物經始於四月二十有二日越九月十有一日告成堂五楹高三丈一尺有奇廣倍之軒楹稱是費凡五百三十三緡有奇取諸公帑之贏者取諸贖金之衰積者取諸舊料之旋售者不以征於民民方病早艱食藉是得食力於公役既竣上下宜之余追念慮始之艱有遠嫌慕潔莫適任其責者有視為蘧廬汲汲若不朝夕者余嬰其敝不憚囂讟以從大役經紀五閱月而不聞澤門興役之謠時拙舉贏而卒免於咎實賴士民和會暨僚屬協衷祇事以能有成迺敢記其始末以勞其事且以詔來世云

知府范涑記曰公府齋居者何府治為別居以視公事者也公事自府治出矣別為居者何簿書期會有恒經亦有大典傳所謂戎祀及選士考績如功令則較藝程書鍵署居業重其事也居而齋者何先儒謂齋為齊齊其思慮之不齊者然與否與子思子稱慎思魯論稱遠慮而十翼乃以天下何思何慮繹咸之繇惡在其慎與遠也咸其無心

乎思慮其有心乎有則憧憧不齊孰甚焉惟慎與遠始能
祛其有以歸於無無者純乎一理妄念屏絕乎上下格幽
明皆是物也無而未始無也所謂何思何慮然與否與故
上聖齋神其次齋心其次齋事神無在無不在世觀其妙
罔覩其功大傳言齋戒神明子輿氏言聖不可知其謂是
歟夫心神明之宰變動不居思慮出入豈皆如聖人則戒
慎恐懼加於無所覩聞不以有事防無事懈動靜合一乃
稱齊心顏氏庶幾亦不得而見之矣得見齋事者可矣考
魯論亦以執事敬言仁敬則萬慮澄空總歸一理凡毀譽
得失利害順逆一切機智皆忘之所謂何思何慮者也制
事制心原非二致於齋事乃見齋心抑入道之教歟居有
堂名抱陽者何堂於府治為北史言負陰抱陽人之生然
也陽於色為赤於人為心報主庇民義本天植彼憧憧者
反失之縱欲滅理又其甚者堂之地即嚴相黨與所籍產
顧名思義或憮然有所惕歟堂前為大門門之楹三左右
內外楹各有差堂後為楹倍於前東以北為庖蔬園西
透迤而南翬然離向者為主靜軒慎動實也主靜要也亦
合一者也齋居之義也居前廣九丈三分丈之一中廣視
前縮二丈二尺後廣視中縮一丈一尺袤十有四丈東西
同鼎新於萬曆丁亥夏五月竣於六月程材鳩工一取於

羨地之值不踰時不費民南昌令何子選同新建令余子
夢鯉營之南昌典史楊汝德督之而余檄之又為記之
劉一燦記曰莆陽盧公來守豫章葺月而政通民和迺始
飭墜緒畫永圖川澤波池坊庸道路之間井井如也亡何
而郡治之堂燬或者曰大夫孳孳勤恤德與吉會法不宜
灾嗟乎是未測天人之故者也夫天之於人或罰之或震
之或開之譽宿則用罰過新則用震其或疹將乘備未起
則寐而覺之令消彌祓濯如商羊之兆於齊樂喜之備於
宋是也豫章故多火漢太守張公躬瀦湖受水火始殺近
且為沮洳已大夫怵然加濬凡水泉疏瀹無不早慮是年
又嘆而祝融不為厲斯非天所贊耶宋景熒惑守心占者
欲移之民移之歲移之卿大夫皆不可卒以身任之大夫
意豈異於是以前四境寧宇而令一人之居受其燼以一人
塗墍築鋪之勤而易萬室之蓋藏大夫權然當之矣時大
夫朝車已戒迺庀材聚工屬倅吳公為植而後行上計還
則歸然雲構矣是役也經始丙午之冬六越月告成事賦
不病民力不刑衆弗溢弗多頓還舊觀既落成而大夫肅
衣冠造余曰不穀奉命茲土廩廩務拊循不獲已與繕為
諸父老子弟憂心竊疚焉子為我記之余曰唯唯夫為上
者未有不勤於民者也大夫之堂考政序事糾刑位宁之

建象魏之布胡可緩諸善為政者為之於堂上堂之不存
政於何有余考與革蓋締造三十七年遂已風雨剝蝕後
空兩宮之役身處畚鍤閒工必中程材必中度贏縮損益
之故熟於目而慮於心辨此何難焉語有之能者有餘拙
者不足部署不失費省而業鉅用力少而課功多此非天
之所以開大夫哉豫章土地赤窶顧盡節公上自其性然
矧大夫下車而省供需輕論贖服妖有禁酺飲有禁博塞
有禁民安環堵而忘大夫之露處馨鼓之聲庸可既乎斯
以徵子來之効已余聞之吏道不貴擾擾則無民不貴偷
偷則無政夫供公家之役而建百姓久遠之利擾耶非耶
溫太真韋武陽竝以惠政顯名豫章今按其故蹟在郡內
居多此寧無事事而傳舍守一官者千百載而下大夫相
照映矣大夫政先興除而要之愛利民為本余適家居習
大夫然未敢更僕為諛畏壘尸祝需之乎大夫入為六卿
三事而余從黃髮耆者扶杖伸其說未云晚也大夫名廷
選壬辰進士繇繕部尚書郎推擇今官倅吳公時憲別駕
袁公守訓徐公一經司理
高公繼元咸在事得竝書

同知署在府治右本理刑廳署康熙六年理刑缺裁因移

駐其署乾隆十四年署同知王時煦三十五年同知久常

先後修葺四十二年同知杜一鴻重修舊志 據册新增

吳城同知署在新建縣吳城鎮其官舊屬南康府雍正八

年移駐吳城九年同知胡式瑗建署乾隆三十一年改屬

南昌府是年同知鍾光豫借廉修葺據册新增

通判署在府署左豫章樓右康熙五十六年通判夏景棠

修乾隆三十四年通判王燾復修四十二年通判李振祖

復修舊志 據册新增

府儒學署詳學校

經歷司署舊在府正堂東年久傾圮雍正年間移駐楊公

講堂在中大街佳山廟旁舊志乾隆五十一年府照磨移

駐新署而經歷署距府遠因令移駐府堂西照磨舊署以

經歷署為公所據冊新增

照磨所舊在府堂西無署官賃民居康熙四十七年建署

乾隆三十四年及四十三年借廉重修四十九年巡撫郝

碩奏請添設府監移照磨管監并為建署於豫章樓之南

路東首五十一年部頒照磨兼管監獄印照磨周泰階始

移入新署據冊新增

按舊志載理刑廳署在府治右知事署在堂東檢校署

在堂西司獄司在府治西大街稅課司署在南浦遞運

所右即舊茶引所昌邑河泊所在新建縣昌邑鄉港口

河泊所在南昌南鄉渡以上各缺俱裁署久廢

陰陽學在南昌縣地方鐘鼓樓後縣志

醫學在善政坊火神廟左康熙三十八年重修乾隆十二

年為藥王廟僧私據醫官訟於官立禁碑復舊縣志

僧綱司道紀司及各州縣四合術俱無定所舊志

南昌城守營署在南昌縣地方棉花市澹臺祠右即會府

舊基縣志

南昌縣署在西大街之右上藍寺故址宋故縣治在郡城

東北隅元遷於章江門內隆興路治之左明洪武初遷今

處知縣黃德銘建嘉靖六年燬知縣陳世輔重建萬曆十五年知縣何選修葺萬恭有記三十三年六房儀門大門燬知縣黃一騰復建正中懷保堂東西二庫

國朝順治五年以後屢修康熙四十二年知縣王廷對重修大

堂齊之千有記 乾隆三十三年知縣徐聯奎增建縣志

明萬恭記曰南昌古豫章輔邑也漢治東廓一舍故爽塏利居室韋武陽徙治今章江之湄地故卑濕永樂初分封寧獻王居藩司署乃居藩司於府基而居府於南邑之故基又居南昌治稅課司之基與新建南北畫土而分隸焉然衙宇西濱章江巨浸湯湯東壓寧藩崇岡言言既又為藩所蝕居其私人危垣重閣迄於今猶未恢復也以其故地極汗下二百年來懸綬者鄙僅構容膝圖旦夕安豈復有攸躋攸寧之度哉吏故傳舍衙宇衙宇亦復傳舍吏故室極湫隘居者數不利萬曆丙戌姑蘇何侯以循良異等調而至於時天久陰雨江漲暴齧而汗下湫隘者曾不可

蓬累而托膝焉乃白太府范公中丞陳公直指孫公獲百金不足乃市公府間居以益之又不足乃捐捧四十金并益之不一三月成之矣正堂五楹崇視公堂博稱之東為思過軒三楹西為報本軒一楹川堂三架外建禮賢館三楹景哲堂三楹以祀漢以來賢令者雖新舊雜治之其實皆新創也始事於丙戌十二月落成於丁亥二月而規模宏遠矣明年水明年戊子又大水侯陸行乘舟濤浪澎湃療疾賑飢載粟里圩與我父老甦旦夕之命者踰三載什九在外十一在內而高明爽塏者又不得久藉而托處焉頃之高畝乃登於是陸之民號侯曰我陸人樂也許許而父母何苦水之民號侯曰我水人生也競競而父母何疾蓋至是侯有寧宇矣乃求余文而紀其事余嘗讀書至治蒲者入其境田野闢入其邑道路平入其郭公宇分明觀政猶以為有三善焉而况仍之以巨浸連之以洊荒縣官所為重足而傍徨室家所為反袂而徜徉者也侯固上之將天子休命次之與舉大吏意指下之彌縫百姓之大難而匡救其災而又令退食委蛇婦子寧止蓋其氣浩故能先民而後身其才裕故能時絀而舉羸其神定故能形勞而心逸異日者持其中軸將外安有如此邑內寧有如此室矣今著之於珉後來者得覽鏡焉

國朝齊之干記曰今之縣令猶古之列侯也周制公侯五等故縣有大小治縣有繁簡貴以才量乎地也我怡齋王公起瑯琊世家由太學合廣信之鉛山縣特移知南昌縣事蓋南昌之為縣大矣縣之事繁矣附會省而為七十八州邑之長古所謂莫大諸侯也重之以憲牒之叢委賓燕之雜擾朝呼夕馳有不暇哺與沐者故雖有才令遑遑文書治事無餘地而遑恤乎他公始至坐廳事循覽周垣詫曰有是哉茲堂之不如逆旅傳舍也毋亦惟是為邑者之以逆旅傳舍視茲堂也雖然受代之未久而以興作役吾民不忍也既三年政務有經人吏浹和於是構材庀工擇日而始事焉未三月工訖公以書來請記予與公通門世講隸籍部內不能辭記曰南昌之入版圖六十餘年矣政事之堂因陋就簡未聞有更而新之者獨公奮然修舉廢墜豈徒以尊瞻視肅體統哉蓋公之所以樹斯堂我知之矣一日宣主德

聖

天子方甚愛爾民江右地外且遠不得直致於爾民以寄之督撫又寄之監司又寄之郡大夫而後以致之合冀爾民飢寒疾苦之上聞而無不得其所則茲堂之所仰而曰旦曰明無敢戲豫者也一日導民情爾民有無可如何之故隱之於作息隱之於訟獄隱之於征斂匍匐輾轉之下雖義

不可緩法不能追賢父母痾瘵在身怛悼慘慼之無已則茲堂之所俯而民視民聽不敢怠遑者也若夫蒞茲堂而有一善政焉積之有數善政焉又積之有數十善政焉風聲所被七十八州邑相觀而益善然則當事稔公之才謂可以剗煩理劇建爾元侯式是南邦者其在茲堂與其在茲堂與經始於康熙癸未二月落成於四月通費木石工銀皆出公俸以權宜足之乃知公才之有餘而及乎他者此足以兆矣謹識其歲月如右俾後之居斯堂者有以自省而不忘作者之所始云公諱廷對號怡齋山東新城人王臣南昌縣令題名碑記略曰南昌為江西首邑號稱文獻然內隸省會外當閩廣吳楚之交又土瘠賦重征科日促十羊九牧民志靡定為之合者縱使才力過人率智慮竭於會期精力罷於奔走求其克盡親民之責非豪傑之士其孰能之然則令吾邑而稱賢於後先者奚宜勿傳舊無題名之碑誠缺典也祁門吳侯自宜春調繁而來蓋有志於親民者期月政孚民和修廢舉墜迺稽邑志得前令宋公英迄葉公國華凡四十有四人第其履任之先後勒名於石虛其左以俟來者以臣邑產也俾識其歲月義不容辭侯名瓊字德輝乙未進士廉明剛斷剗繁治劇綽如也茲維曠典之舉垂師戒於永永遺愛吾民其有涯哉其

有涯
哉

儒學署詳學校

縣丞署舊在縣堂左康熙四十八年知縣佟世俊購買民地建於署西南鳳皇坡乾隆四十二年縣丞張昉借廉修葺據冊新增

主簿署舊在縣堂右今移三江口巡檢署先是雍正七年吳城移駐同知移吳城巡檢駐三江口動帑建署乾隆四十年巡檢錢江借廉修葺四十四年巡撫郝碩題准改巡檢為主簿署仍舊據冊新增

市汊巡檢署在市汊下街舊在市汊驛之東明末燬於火

國朝順治初乃遷今處乾隆十三年巡檢李漢增建縣志

典史署舊在縣署右康熙四十八年火知縣佟世俊將衙前別公講堂改建乾隆四十二年典史楊瀚借廉修葺縣志

南浦驛署在南昌縣地方廣潤門外壘子巷東街今裁改按察司知事署於此縣志

新建縣署在府治西稍南宋故縣治在縣城東隅卽南唐林仁肇宅址太平興國閒主簿何慈創建黃公權有記元

遷於章江門內隆興路之右明洪武三年知縣李璿遷於城北司馬巷永樂元年改爲府治徙於東湖之左卽今貢

院十八年復遷今處宣德三年知縣茅自得重修

國朝順治五年燬於兵權移射圃亭都督舊署十七年知縣魏雙鳳重建中為親民堂後為新新堂康熙十九年知縣楊

周憲增建

縣志

黃公權記曰為後世之吏得行其志者少矣此仕之所以難也而縣為最甚何哉凡縣之鎮無大小令主簿皆獨任而民事委曲當有所操縱急不能一斷以法緩舉法而繩之則其罪故易求也凡有所為問可不可於州執一而違之則其勢固易撓也其罪易求其勢易撓故為之者有以得於州然後其濟可幾也不幸而一一錙銖與之弗則大者求其罪小者撓其勢將不遺其力矣吏之不能自安豈足道哉縣有不與其擾者乎方是時也天下能忘其勢而好惡不妄者鮮矣能忘人之勢而強立不苟者亦鮮矣州負其強以取威縣憂其弱以求免其習已久其俗已成之後而守正循理以求其得於州其亦不可以必也則仕於此者欲行其志豈非難也哉君子者雖無所處而不安然

其於自處也未嘗不擇仕而得擇其自處則縣之事有不敢任者豈可謂過也哉洪州新建自太平興國六年分南昌為縣至嘉祐三年凡若干年為令者凡三十有九人而秘書省著作佐郎黃巽公權來為其令抑豪縱惠困窮守正循理而得濟其志者也公權亦喜其職之行因考次凡為令者名氏將伐石以書而列置於壁間故予為之載其行治而因著其為縣之難使來者得覽焉

儒學署詳學校

縣丞署舊在本縣治右今移射圃亭乾隆四十三年縣丞

張五緯捐廉修葺

縣志

吳城主簿署在吳城驛南即吳城巡檢署乾隆四十四年

巡撫郝碩題改巡檢為主簿署仍之

縣志

生米巡檢署在生米鎮原為烏山巡檢後移駐生米鎮乾

隆二十九年奏請改給生米鎮巡檢印 縣志

趙家圍巡檢署在縣東鄉今裁 縣志

典史署在縣右稍南 縣志

按舊志載郡城內有總督部院署在城隍廟右本元平

章府

國初為提督軍門府康熙元年為總督府四年改為總鎮府

十三年總兵楊富叛署廢今名楊家廠又載清軍道分

守湖東道分守湖南道三署俱在布政司大門之內分

守南昌道在廣潤門內鐵柱宮前分守九江道在糧儲

道西清軍道在忠臣廟右南昌道在易俗坊湖東道在

明倫路湖西道在洪恩橋分巡九江道在蓮花池察院

二所一在按察司東舊城隍廟故址一在鐘鼓樓之右

卽菩提寺故址今俱廢 省志

豐城縣署在縣治正中唐永徽二年遷縣創建宋皇祐初

縣令郝脩輔建勅書樓 周鶚有記元至元二十三年陞為

州至正壬辰燬於兵明洪武二年知州強立增修九年仍

復為縣知縣林弼重建二十九年縣丞何昭善充拓之正

德初知縣謝顯修隆慶二年知縣張正道重修 雷禮有記

明末燬於火

國朝順治八年知縣宗彞鼎建 自有記康熙五十四年知縣盧

佐斌重修乾隆三十六年知縣于崇勅借廉修葺四十二年知縣鄭樞借廉復修縣志

周鶚記曰上□□之明年冠元皇祐构建訾陬之初豐城勅書樓成長棘寺丞郊侯授筆於周子書草故也宮城通制凡邑吾民宣教令必壯署以表其位有表必轍門以吭其署署有吭必威俗以制其觀乃冒門梁厦曰樓將以嚴甲令而虔王命也完版圖而厚生齒也故額繇是舉惟江西總治邑七十引上游者茲為望初冬十月侯甫蒞厥事偃然殲弊病補廢弛彼稂且秕耘去略既翊載中商民亡駭政乃曰位苟稱祿作弗圖欵隙焉足勤吏師若解舍之右前治更葺僅備迄是樓會守將幾重斂而息今按所委之材得請於府遂稽工程力勦朽撤敗隆其甃砌役弗外撓督削須備則擇綠垣老樹之材者會數浹日考焉輪焉制作度焉公庭觀焉觀者毅然所謂甲令版圖則僉焉君子曰樓者樓也明於外景物形勝之謂歟中民病苦也明於內除衛顯敞之謂歟馭吏之儉黠也若其內外之政令行豈特樓之營而實治之經歟夫飭燕嬉豔賦詠不其遠而嗟夫仁人之作也勿亟是宜民不復勞而君

子將其美故書樓成

雷禮記略曰豐地官署自唐以前不可考永徽二年建堂於中後罹兵燬元至正十六年重建入國朝洪武二年強侯立增修二十九何丞昭善復克拓之至正德初謝侯顯以廳圯草創構堂年久因循弗葺日就頽壞隆慶戊辰潼川蕭山張侯以進士來知縣事周覽咨歎曰噫哉土敞則草木不長澤淤則龍蛇不宅茲縣蒞政之地民所依也而若是陋乎具狀請院道咸報可責之成於是侯規度程督升基高三尺創正廳及站廳各一所後列正樓廳東創思補廳并明樓各三間前峙儀門一座凡七開門外左右迎賓館右立造册局各一所又建龍亭庫土神祠及兩廊卷房從後站屋俱易其故址取欵毀疎曠及漫漶摧剝者葺飭改觀士民樂觀其盛翼如也既訖工屬予記其事云國朝宗彞鼎記略曰余來豐有熊坊墻者當贛吉水之衝歲時潰決大為民害予汎舟載石荷鍤楯而先之可幸至今無患建學立舍亦次第就舉而縣治之堂則戊子兵變所焚而壞者余欲構起之或止余曰工維難哉營室勞民盡以俟後人余曰不勞民營室何如於是難以一木一石煩我子弟而竣事堂既成豐楹而邃宇廣以密高以深聽治於斯用肅瞻視足蔽風雨且題之曰畏暑堂以識予志兼告

後人焉士大夫稱引誘掖以予有類於古之名吏予謝不
敏予所慕者蓋郭林宗一事昔者郭林宗每宿逆旅則掃
除潔清後至者知爲林宗宿處古人整理辦治之才不遺
逆旅如此而今之人居家反如逆旅予固心耻而不欲道
矣時維順治乙未年八月吉日

儒學署詳學校

縣丞署在縣署東乾隆三十二年縣丞黃汝源借廉修葺

四十二年縣丞何浩借廉復修縣志

主簿署在縣署內康熙間裁縣志

大江口巡檢署距縣三十里卽柿源巡檢乾隆二十九年

改設將舊署基變價建今署縣志

江潯巡檢署在二十七都今裁縣志

典史署在縣署東乾隆三十四年典史梁耀祖借廉修葺

四十五年典史楊式玉借廉重修縣志

進賢縣署在壇石山南宋崇寧二年創建紹興二十六年

縣令杜易重修乾道六年縣令張嘉謀建清陰樓景魏亭

望雲亭慶連堂元至元十二年燬於兵縣丞劉勇重建至

正七年縣令周天祥增葺明洪武間知縣李思中復建正

統中知縣張冲重葺正德二年知縣李學會以堂址卑隘

乃撤後堂爲廳事嘉靖十四年知縣蘇志臯重修

國朝康熙二年知縣聶當世重建廳一重顏曰保赤堂饒宇棻

有記後雖屢加修葺而無增建縣志

饒宇栳保赤堂記曰鍾陵據會省之東取道浙閩者類信宿然後去故治象盛衰純疵常為四方觀瞻取法治故有堂寢燬於兵踵事者乃析民居新之柱礎門屏取具而已非能高明廣大以有壯望邑之觀也玉沙聶侯以名甲第來尹吾邑凡事之有待新者無不畢新新學宮矣又飭城垣新倉廩矣又建伍相國廟修羅溪矣又修郊圻之橋梁進賢固瘠土侯休養生息舉公事之宜新宜飾者朝發夕告成事乃顧瞻茲堂猶仍舊貫非所以作民敬而告以居官之未可假易也於是以前年某月庀材命工不旋踵而堂成取材自公民不知役然後知侯之所以安位者勤愛民者仁而報

國者大也蓋上所示於下者莫如體而下所貢於上者莫如情夫其體不崇其志不肅其情亦必不出也夫上所以治下與下所以受治者幸以為分耳以為分則惟我所命尊嚴則尊嚴之苟簡而亦無不尊嚴之亦安所見民違順於其間哉而黠者則有以窺之矣反覆隱藏即嚴刑峻罰而情不出蓋不情生於不敬而不敬生於不肅居卑隘之堂而希隆盛之理上不求於下者略下所報於上者微治固然也侯精微博大事不可已必求安好而後止類如斯堂然則斯堂也以為大令布德行惠之所而即億萬姓望恩

希澤喁喁待命之所以為大令曲直得情之所而即窮簷婦子顛連觸目之所登斯堂者安得不瞿然深思暢然遠覽哉侯仁政多端美不勝書而於斯堂顏之曰保赤又署之曰居敬其意固倜倜乎遠且大矣因體侯之意備書之以告後之官斯堂者聶侯諱當世號二瞻湖廣監利縣人順治戊戌進士

儒學署詳學校

縣丞署在縣堂東乾隆四十五年縣丞王世鈞借廉修葺

主簿署在縣署西已廢 縣志

梅莊巡檢署在縣東北四十里雷家莊即鄔子巡檢乾隆

三十年改兼管潤坡巡檢移駐梅莊舊有治東八十里之

潤坡巡檢署治北百里之龍山巡檢署治東百餘里鄔子

巡檢署治東南四十里之桃花巡檢署缺裁署皆廢縣志
典史署在主簿署南乾隆三十四年典史朱士任借廉修
理縣志

河泊所署在鄔子口已廢縣志

奉新縣署唐神龍二年新吳丞高良弼創建於馮水之北
宋嘉祐八年縣令丁餽修葺嘉靖間縣令張國均重建譙
樓趙彥章有記 并建華豐亭於治右明初知縣王溥建縣

廳時無解舍寄居民間洪武三年知縣余思濟創建十四
年知縣黃壽創建譙樓宣德間知縣璩鎮海重建正廳景
泰三年知縣劉讓重修成化十二年知縣岑方重建譙樓

張元禎有記

嘉靖元年知縣朱雲鳳於堂之東西創瓦房
三十間十三年知縣胡億建通和堂萬曆二十一年知縣
馮珽重修

國朝順治八年知縣王家禎修葺十七年知縣黃虞再重修康
熙二年盡撤其舊而重修之建譙樓五十九年譙樓圯知
縣鄭毓改為平屋乾隆四十一年知縣甯有誠借廉重修
縣志

明趙彥章記曰重門擊柝肇自古初外建皋門實重侯國
夫門之制尚矣奉新縣門南向自唐神龍遷縣以來未之
有改也按續題名記政和中縣令上官允若始創樓又三
年寢失舊規相傳於士人進取不利自此更五六十載間
進士登科題名僅三四而鄉大夫賢人之書或比歲一獻
開禧丁卯會主簿趙希義主學邑人士相率以告乃為請

葉令君筭撤舊屋視嚮一新之衆志翕然費不約而集工未輟葉代去陳令君堯仁踵其成終弗克備庚午秋尚書簡肅南城張公之孫國均字維之始至卽病之顛力未遑也乃先修學校崇敎事雖餼廩膳爨之末無不備飭明年俗益康政益暇乃率僚佐進諸生少長於學舉鄉飲酒禮遠近來觀者莫不興起又明年君報最將及瓜邑內長幼狀其治行詣府乞留者數百人一日諭於衆曰縣樓更造既再竟成道旁之築今索然層屋而已耳如人形體略具而精神弗隨其何以聳民之視聽壯吾邑之形勢哉乃命日量功而落成之是科鄉薦四人半在郭郭待補太學者又五十人於戲豈君垂意作成天固相之誠若所謂興作之會契於陰陽之運土木之功應於福澤之數者歟時創樓之士咸以記請君曰此非某之功前人之功也然某得承茲邑值時和歲豐上官仁賢寬其成督得與諸君相從事否則財一掣書雖欲善得乎此又非前人之功上人之功也士若民喜曰此令君所以爲君也使來俾彥章記張元禎記略曰奉新南昌大邑賦稅獄訟往往倍厥鄰境太平岑侯登賢科而來尹大邑旣逾年凡事之當爲者次第爲之略盡斯固有爲者矣矧年穀再登民安其業舉廢隆適其時歟邑治之南有鼓樓巋然高峙下通一道舊架

以木歲久傾圯俟出人過之一旦顛謂其僚曰環有百里閒爲吾之民有耕者有織者有誦讀負版者又有奔走趨事不一其役在公者晨昏之際咸惟更鼓是聽斯樓更鼓之所在也有警乎民最切將使情者勉勞者息蓄奸懷慝者畏縮而不敢肆何莫而非斯樓之功歟今若此弗稱具瞻乃出俸資之餘倡率僚屬壘石爲臺構重屋七間高三丈四尺有奇深三丈而廣倍之加半焉經始於成化丙申六月六日落成於丁酉三月之望旣堅旣完不美不麗壯乎舊觀而置更鼓焉邑之父老咸喜侯有成績礪石介司訓嘉禾額君望來徵予文以紀始末昔張希顏令萍鄉因更鼓分明獲知於范延嘗而受張忠定公之薦奉新去萍鄉不遠侯之才視希顏亦不讓政之善者固不止此當必能知而薦之有日則更鼓寧可以末節細務觀之而斯樓之作其可已哉侯名方字尙義先府君守潞州有能聲邑丞王君琛判部孫君知幕僚楊君忠司訓鄭君和顧君望馬君晉皆稱其官而樂助者也如耆彥秀民董役輔義而凡有功於樓者亦皆次第名氏列諸碑末是爲記

儒學署詳學校

縣丞署在縣治左宋紹興二十三年以尉廳爲之淳熙七年改建於治西北後燬明洪武三年仍遷入縣治之東縣志

國朝康熙二年始建於今所乾隆四十七年縣丞江瑤借廉修葺縣志 新增

主簿署在縣治右已廢縣志

羅坊巡檢署在羅坊鎮明洪武元年巡檢王良玉創建宏治開通判應尹重修

國朝雍正十三年巡檢周篤生於原址復建舊規乾隆四十七年巡檢馬厚培借廉修葺縣志

白沙場頭巡檢署在富溪今廢縣志

典史署在縣治右宋紹興閒改爲丞廳典史僦居民舍明洪武三年仍遷入丞廳前

國朝康熙二年始建於今所乾隆四十三年典史錢元銓借廉修葺縣志

靖安縣署宋紹興閒縣令黃宗諤於廳事後創製錦堂幽谷百花二亭後令楊億又構水木清華亭明洪武二年知縣衡守敬重建十三年知縣朱宗晦作尊美堂自有記正

統八年知縣金文英修葺成化十六年知縣劉芳建後堂三閒曰復思堂宏治十六年知縣張伯祥立土地祠於儀

門左正德六年燬於寇七年知縣萬士賢重建嘉靖元年
知縣葉金撤而新之正中牧愛堂後為居仁由義堂三十
四年知縣周麟建後堂三間曰思審堂三十九年主簿黃
應徵重修大堂顏曰公正廉明四十一年知縣趙公輔增
置吏舍廳後建堂曰慎思堂崇禎五年知縣章鳴謙顏大
堂曰君子堂

國朝康熙七年知縣任嘉瑞增修二十五年知縣鍾芝豫易後
堂曰君子大堂曰端本二十七年君子堂圯知縣高克藩
重修并建後樂亭自有記五十二年知縣李作仁重修後
堂乾隆十四年知縣馮渠重修大堂自有記增建棠蔭軒

枕繡亭十七年署縣朱堂修葺縣治內外自有記二十六

年李紀重修自有記三十九年知縣鄒朝陽借廉修理縣志

明知縣朱宗晦尊美堂記曰子自為浙西經掖時與有志
之士究論先聖為治之道未嘗不慨然興歎暨拜天子寵
命來牧茲土得以行其所可為安敢不竭其忠誠以著學
古人官之效署北舊有堂宇檐傾壁圯予始而修飾之以
為燕處治事之所揭尊美二字以為修己之助邑有儒士
進而言曰善哉令尹斯堂也靖安邑小而民瘠令尹以五
美存諸心吾屬其有瘳乎昔趙宋時曹幽為簿於茲後至
宰輔人以袞繡名其堂名則美矣然止於稱頌而已於國
家何補楊億先生為令於茲構水木清華亭於邑治之東
南豐先生來候云雖為千家邑正在清華閒至今以為名
言景則美矣然止於適趣而已於政治何益孰若吾令尹
尊五美之可尚也修己之學愛民之心具見於此予乃進
生而語曰古之言治道之大且詳者無如孔子孔子歷述
堯舜禹湯文武之政治於魯論記者以答子張問政之目記

於帝王之後然則為政之要孰有大於此者乎吾與二字判簿長史皆筮仕於此發軔去柅能不以五美服膺哉姑以斯堂論之因其舊而修飾庶幾不傷民財惠可不費矣民少有勞或可無怨矣吾處是也期政平訟理得其所矣而不為貪吾臨於是務心平氣和信亦泰矣而不為驕或進縫掖討論治道或語吏胥推究事體或理訴牒審實獄情儼然以為民望吾之威庶不猛歟若是則吾與僚佐不負斯堂之美矣後之來者有見於此智者尊之昧者反之苟縱其利而費繁勞其民而怨積欲而貪者或匪仁慢而驕不克泰衣冠瞻視之正大之威箠楚躁謬肆苛酷之猛而肆志則美其所美而非吾斯堂之美矣生再拜曰斯言也愷悌無窮之意也請記以為斯堂鑒予以生之請頗有符子浙西縫掖之意遂書以置諸壁閒使後之君子有以知予之心

國朝知縣高克藩後樂亭記曰廳事之後退食之所名曰君子其右曰尊美堂其西曰西園西園之後曰慎思堂中為明德堂東為東園園舊主簿廨堂曰哀繡為曹幽立也堂左有柳亭有曲沼堂右有廢亭予撤而新之顏曰後樂別為牆以閒之為門以通以繡谷桃源羅列若屏障蒼翠可掬

花木之屬有桃有柳有棗有榴有古樟一冬青一棟一橙一有紫荊二桂樹二有老柏四新柏二有芙蓉有臘梅有茶藤修篁繞徑雜木成林編竹為籬刈草為圃方幅咫尺之區隱有城市山林之况可眺可吟可飲可射可乘風可坐月可望積雪可覽雲霞變幻之氣蓋遊目騁懷時行物生之致於此乎備之矣余考邑乘昔者黃宗諤令茲土於後堂創製錦堂有百花幽谷二亭楊億治尉圃得會南豐幽谷亭詩碑用其語構水木清華亭物換星移三亭之舊址無從過而問焉大率名亭之意皆寓山水之樂為耳目遊觀之資而余易之以後樂者蓋不以山水之樂為樂而以一邑之樂為樂亦不以一邑之樂為樂而以天下之樂為樂後之者緩之也慎之也使人寓目警心思而得之也此則余名亭之意是為記

知縣馮渠重修大堂記略曰靖邑自南塘改場為縣衙署始建前明正德閒阨於兵燹嘉靖元年從而新之迄今幾二百年守土者迭更而堂已垂圯矣余於丁卯春移官之靖顧是堂即思有以修葺之而蒞任以來催科撫字與夫簿書期會之繁鹿鹿未就也今歲邑紳士咸願釀資從事來請於余余轉請之上憲旋奉允行乃鳩工庀材八月興工九月落成於是乎有輪奐之觀焉夫事難於圖厥始亦

聖朝

難於保厥終守土者知今日興作之勞而為未雨綢繆之計則永久可垂豈復有前此傾頽之患乎顧堂公堂也事公事也昔鍾離意為堂邑合出俸錢作屋民齋茹竹或持材木爭赴趨作不日而成猶市屋耳今斯堂也諸紳士踴躍赴公一若自為築室計而不辭蓋其尊親之心蓄於中斯急公之舉見諸事非然者其肯身任若此耶此與堂邑之民何如也余不敏疎於治術然夙夜兢兢竊嘗以教養是務所望吾民共敦孝悌忠信之行遠囂凌詬誶之風而登斯堂也於飲射讀法而外跡罕至焉則士為修士民為良民於以成仁讓之俗以永沐

宜溧水人監斯工者縣尉姓崔諱宏道大興人會計出入以終其事者則邑紳士涂尚忠舒親生錢景福舒泮暨縣民舒帝簡也例得并書

知縣朱堂記曰縣治內外均關政治不小也歲辛未夏五余署靖篆其在署外者唯堂廨粗完固堂下清華亭則久圯兩旁胥吏屋宇風雨無障蓋大門三楹棟且撓門外屏牆逼於門木欄亦未建內則衰繡堂三閒僅存故址及舊額常平倉五十餘座竝朽蠹不可支且夫蒞官者日當事其事詎可從久暫起見哉余目擊諸廢墜不敢怠厥功爰

設方計先建清華亭以天語警心目次俾胥吏貯案牘各有所次繕大門次拓屏牆於

旌善癉惡二亭外規模既宏敞民望之心更肅然東西設木欄各顏其上曰新民曰保赤官箴亦揭於眾耳目閒矣至起衰繡堂祠倉神舊倉在東北今移於西東為積貯計久長於戲事關政治苟弗克勤則不敬莫大焉奚止曠乃官歟因次其始末為之記

知縣李紀記略曰余蒞靖修舉廢墜悉出清俸鳩工於署前起屏牆復漢唐郡縣眾愚之體東西對峙圍以木柵榜曰志切興隆心懷撫字左右建申明癉惡亭二大門三楹檐俯而卑無以飭觀撤而新之增以飛甍高其間闕規制軒敞望若岑樓仍舊額而冊籥之儀門內戒石木牌仍用

南豐詩意表曰正在清華閒廳事俗皆曰大堂予取尚書義顏曰顧畏民崑題二聯於柱兩廊吏廡入隸役班房二皆垂朽復新之內堂幕廳東西庫庖溜之所棟桷欹腐者易之牆垣頽塌者築之壁之剝落者圻以粉瓦縫之參差者承以簞較舊制已煥然一新矣若其亭臺池沼蔦木葱蒨非不足以賞心而娛目余奉

命守茲土方將勤求治理圖報涓埃簿書鞅掌亦恐日不暇給又何敢寄情邱壑重勞土木之竝與耶工既竣余因為之

記

儒學署詳學校 縣志

縣丞署康熙七年創建在縣署東偏乾隆四十四年縣丞

陳樹華借廉修理 縣志

主簿署在縣署之左卽宋袞繡堂已廢 縣志

典史署在縣堂之左乾隆四十四年典史曹廷棟借廉修

理 縣志

武寧縣署舊在高鄉西安里卽西安縣治唐景雲初東遷於羅村饒灣之間天寶初縣令范建殊復遷於玉枕山前卽今之縣治也宋時縣令呂晉夫於廳左建東軒紹興五

年縣令上官世美重建淳熙十年縣令洪檀復改東軒爲

絃歌堂明洪武元年知縣但元行重建二年知縣盛文郁

復建 盛應期有記 成化元年知縣余希賢建大堂十四年

知縣王僑建譙樓二十一年知縣洪琦修葺宏治年間知

縣林本淵毛騃復修嘉靖元年知縣陸浚梁稟復修二十

年知縣唐牧大加修治建保寧樓於署北中爲忠愛堂後

退食堂 張寰有記 萬曆四年知縣胡東陽修 自有記 七年

知縣高堪修葺三十一年知縣李呈芳建聞過軒三十七

年知縣周道重建大堂三十四年知縣張茂柏復修天啓

閒知縣徐士華修崇禎時知縣徐鳴時再修未幾燬於寇

國朝順治四年知縣任天祚建正堂署縣事夏遵虞續建十四

年保寧樓燬十八年知縣馮其世即保寧樓基建躋寧樓

湯民貞有記 又重修縣署又築北辰樓 盛彌願有記 又修

理監獄 張仲友有記 雍正五年大堂圯知縣方聲亮重建

乾隆二年知縣吳之彥繼建 縣志

明巡撫盛應期平政堂記曰山之巉曲奧僻者草木叢茂
狐狸穴其中虎狼躍其上魑魅魍魎鬼怪雜獸咸於是萃
焉蓋其幽足以潛形險足以固勢雖密設羅網其崎嶇坡
側之陰適以資其號叫跳浪蕩然無所顧忌耳若夫中原
曠野沃壤寬閒人烟繁盛森林芸芸各安其性雖狡獸怪
物不待機張隱隱潛遁寂然無所施其技者何也其地平
也故曰王道蕩蕩王道平平吾宗盛公文節以明初尹武
寧書其堂曰平政寧山邑山峻而逼民稱難治公宰之若
無為迄今百餘年民猶思之其有得於是者與噫世之谿
刻峭厲急於自用卒無成效者聞公風其亦可以少愧矣

江西巡撫都察院吳江族人盛應期書

明參政張寰保寧樓記曰嘉靖辛丑秋上海唐君世惠以
國學典簿擢武寧環山以為縣壤接楚尾民多流移時竊
發為盜而城故築自唐縣令范建殊廢久元至正間賊大
肆害宏治初復然知縣毛騏增築之正德閒華林瑪瑙之
亂再擾長樂上南官吏皆散徙去君廉得其故笑曰寇至
則去邑誰與保夫安不忘危臣子職守也事苟無備而一
日有警則符籍帑藏將安所歸乃與民謀修四門完飭鞏
固又構層樓於縣解後以為保民計不三月告成邑人創
見怵慶且觴而落之斯樓也玉枕伊山峙其陰白崖柳峯
當其陽天馬金雞羅屏鍾鼎拱列左右俯視修江以達支
流委蛇縈帶而四時景狀雲蒸霧靄喬變無端勝斯萃焉
幸方際昇平挾僚佐招文學以時觀遊節勞逸優游於其
閒唐君顧獨為身是謀哉期與嗣為邑者圖永久而符籍
帑藏將於是歸庶幾上下倚賴有以相保詩云君子所依
小人所腓斯樓之謂也遂名之曰保寧識者韙之君乃述
其事屬余記予唯世之有司率多以所寓為傳舍閒一葺
治不過過粉飾耳目苟安旦夕而鮮有加意於民者唐君獨
能深謀遠慮為一邑安危計建此鴻圖以貽將來有必保
吾民寧吾民而後已焉其用心果何如哉後之登斯樓者

其亦可以知唐君之吏治矣故爲之記以銘諸石云
知縣胡東陽題名碑記曰題名記者何記官之名氏也我
明稽古設官邑有令有丞有簿有尉凡以爲民也居官任
職者思朝廷所以設官之意俾民愛之如父母則秩無尊
卑任無久暫唯其無鰥於職守而止不然豈其使漫然肆
於民上以尸位苟祿已哉邑建於唐舊未有記元以前湮
沒無徵不復識已明興自但元行以下五十二人余悉記
而勒之堂左序其鄉籍紀其官階使後之覽者得以指而
議之曰某也廉某也貪某也民之慈父某也邑之鷹鷂直
道昭於久遠法戒貽於嗣續凡蒞茲土者觸目警心監今
視昔得不悚然自惕乎夫人聞譽則喜詈之以惡則怒其
性然也而况一命以上受爵於君食祿於民其忍恣淫自
卽匪彝而不係民以久遠之思哉余與若僚旦晝在覽亦
庸惕其鰥曠云

國朝教諭湯民貞保寧樓記曰武寧舊衙退食堂後有保寧樓
形家者云以迎龍脈而壯地勢也無何災於順治十四年
丁酉逮康熙四年乙巳馮侯其世建樓明年三月樓成顏
之曰躋寧有取於攸躋攸寧之義焉侯蒞政以來不事敲
撲與民休息如治苗然護其良而去其害灌溉滋長以待
有成蓋五年於茲矣侯以風雅自贍優游有餘登是樓也

太清涵空爽氣飛來北彌玉枕西接九宮南望柳山東眺
吳峯足以收一邑之勝而侯若欲然不足當夫土膏新潤
萬草含華則思幽村僻壤有難於舉趾者乎曰何以省之
又或晴霞曉燦綠陰芳穠則思町畦溝洫其有暑雨之咨
嘆摧之歎乎又何以慰之及露團雲斂修江練明亦已西
疇告成其有滯穗不沾授衣無計者乎吾何以助之至夫
霜風凜栗雪花飄空時或物窮力絀將無有茅簷不葺婦
子靡寧者乎其又何以周之時序變遷觸目警心其閒往
復圖維有必登諸衽席而後厭者庶幾攸躋攸寧之意與
侯皇然曰是吾心也而未逮願以俟後之君子

盛彌願北辰樓記曰縣治城之北徑通興瑞山藪綿連時
竊發爲盜藏奸叵測而北門爲之蔽向闖逆寇武謀攻於
北累晝夜輻櫓器械畢張駭人耳目城內率丁壯相拒卒
不能下馮侯詢往事乃相地勢爲治安計去北門透而西
計十餘丈築臺臺可遠望爲樓曰北辰蓋一邑之樞紐於
是乎屬焉嘗讀左傳僖公五年正月辛亥朔日南至公既
視朔遂登樓以望而書禮也凡分至啓閉必書雲物爲備
故也侯之建是樓也其知所務矣雖然城爲外備而民爲
根本吾不爲之所信無備矣苟兵至而民逝則昧於其本
也故春秋書浚洙書城中邱重民力也養民之道在愛民

力民力足則生養遂教化行風俗美內有所恃而外有所備唯良有司是望耳吾侯愛民如子而以其餘閒爲一邑久安之計不勤民力不費民財巍然莫此巨觀固非尋常與築而爲無益之舉者願得於羣士中而請誌一言以爲異日牧民者法

張仲友修理監獄記曰邑之有囹圄聖王不得已設之雖禁奸暴亦必哀矜勿喜之意寓乎其間曲爲軫恤而後天地生物之仁庶幾相維於無窮是故天官以貫索虛盈規政治乖和非偶然也吾邑地瘠民貧物力相絀逋賦相仍羈禁日煩充斥淹滯往往有之雲夢馮侯甫下車閱及監獄惻然曰皆吾赤子也何忍坐繫至此取爰書出入輕重條其可宥者聞於上盡釋之時辛丑臘改歲時也又念一二留獄者既失保萃之歡復無飲食度歲之資錫以酒米使得安息人人歡忭獄故瓦桷摧折牆垣圯頽其地壅滯泥汚積闕不疏惡穢叢鬱致生災禍乃鳩工度材一完葺之廢者以理滯者以通而獄大治焉旣成邑父老子弟屬子曰侯仁我民若此其能默然耶蓋文以誦之子感而言曰侯之大有造於武也能育物也能廣恩也古人有開雖麟趾之意而可以行周官之法度若侯者慈祥豈弟獄雖設而期民之不入也將見囹圄空虛園土蕭然而侯之功

德流於史冊者方大書特書之不暇又豈予文所能竟哉姑爲之記以塞其意云

儒學署詳學校

縣丞署舊在縣署左乾隆二十二年移駐年豐鄉木高地

方建署

縣志

主簿署今裁

縣志

高平巡檢署在年豐鄉雍正三年設

縣志

典史署在縣丞舊署南

縣志

都司署在縣治東北卽布政分司舊址明崇禎時建

守備署

國朝康熙四年守備房光先增修五十六年守備扈養肅建客

廳雍正十一年改爲都司署乾隆八年都司李大成重建
十六年都司楊焯建校射堂 縣志

寧州署卽唐宋分寧縣治在鳳凰山南一里唐貞元十五年始創宋元祐閒縣令蕭從建肥民求瘼靖共三堂 黃庭堅有銘

宣和閒縣令韓駒建醒心邀月問春三亭建炎閒

陞義軍尋復爲縣景定閒兵燬縣令任滄復建元陞爲州

遷治爲武寧縣明洪武二年改州爲縣知縣項中宣於州

治舊基創建成化十年知縣蕭光甫撤而新之 錢溥寧有

記宏治十六年御史林俊具奏改縣爲州十七年知州葉

天爵重修顏其堂曰明通公溥 楊廉陳瀾皆有記十八年

復增修之正德二年知縣沈暎修葺萬厯五年知州石漢

增建鐘鼓樓後燬於寇萬厯二十三年知州方沆重修大

門儀門 自有記

國朝康熙五年知州徐永齡捐修其後知州任暄猷祖維衡相

繼改葺雍正九年知州李化龍倡捐重修 州志

宋黃庭堅三堂銘曰茂宰蕭公來撫我民自初迄茲惠政
日新父母慈之知其苦樂吏瘦民肥猶求其瘼靖共在堂
敬畏在廷賓禮士子有涓有涇我銘三堂式頌式勸繼續
公者無墜斯憲

明錢溥寧記曰是時成化十年夏芾田蕭光甫來知寧縣
事寧卽唐析武寧八鄉地爲分寧縣宋因之元至元間始
陞爲寧州明洪武初改寧縣仍州治其堂以歲久漫漶
將及於毀光甫顧而歎曰縣仍州堂僭也將毀弗治慢也
僭則官昧其制慢則民易其令官肆於上民忽於下而欲
縣治得乎縣本禮樂法度之所苟僭且慢而欲移易其風

俗安定其民志可乎卽有事於興舉然縣隸南昌府府隸
藩臬上下相距幾四百里民散處山谷間傲義而循仁加
以旱蝗相仍盜賊竊發於其境居民流徙而之他者衆乃
曰民吾赤子也忍視其墊溺而不恤耶盜亦民也可縱其
剽掠而不知所戢耶遂大申約束明教化振興廢休聞四
起盜乃斂跡無譁民亦轉緣於南畝災青自息歲稱有年
光甫始自喜曰是可理吾室矣達於所轄撤其故宇因材
於山範篋於治役民於隙而室遂完美入其門其門洞開
知其心之無壅蔽也至其庭其庭如水知其訟之清簡也
攝而升堂堂改塗以墨安其分也居高聽卑知其情之下
達也靜聞堂上之分寧人勤生而嗇施薄義而好爭以今觀
遠也會子固曰分寧人勤生而嗇施薄義而好爭以今觀
之民尚嗇施而好爭乎是化蓋有待於光甫光甫由癸酉
貢生潼川州學正陞知寧縣以憂改任將滿去父老千餘
詣藩臬乞畱以慰民望蓋賢令也其縣學訓導上虞余良
具實來請記遂書此俾刻寘於縣之壁
楊廉明通公溥堂記曰分寧陸州冬十一月婺源葉君天
爵來爲守握章之閱月卽謀所以新州之治者蓋視事之
堂棟宇朽蠹將撓儀門廊廡苟且相附位置不分而頽敗
特甚鼓樓處西偏出入必罄折於是卽其偏者鼎而新之

離而正之卽其朽蠹頽敗者否而革之可而因之勞費未
半而成功倍之與州而同一維新焉州之新者何分寧吾
南昌所屬也其名因革靡常唐德宗時始析武寧八鄉地
分而爲縣曰分寧者蓋取諸此也宋因之元至元間廼躋
縣而爲州明洪武二年改爲縣至宏治十六年復爲州前
之州與縣固各有義不暇及今之州也以其地巖險西北
諸山迤邐數百里連峯接岫豪強倚以武斷急之則挺變
都御史林君俊巡視吾土深爲之慮用知府祝君瀚言以
爲地大物衆所臨乎上者非隆其秩無以彈壓之遂以州
請詔可之卽張置官吏而州焉然豈特州與州治之新而
已哉葉君之甫至也卽以分寧之舊俗與所以圖乎新者
召父老於庭與之約復備以榜之通衢用徧以告其州之
人而其舉錯設施固莫非與民圖新者其意以朝廷之新
乎州非新乎州而已且非新乎州之治而已欲新乎政也
欲新乎民也葉君於新州之先後本末可謂知所兼舉矣
是役也州同黃君輔州判陳君興皆協心戮力而於民之
知義而可任者俾分董之如堂如門如廊廡則以陳樹如
鼓樓則以查仲春陳潛劉雅才劉季芳張文華工旣畢葉
君具顛末遣生員陳由仁來徵記昔程子因其徒孟厚不
治一室而曰洒掃得潔淨莫更快意朱子見造居有門橫

縱巷出者曰直是公道橫則與世相均而亦最病夫牆傾
 壁倒而不理會者葉君之新州治也又有得於程朱二先
 生之遺意矣矧官府之次舍等級降殺截然攸寓固於私
 第有弗類哉葉君以名進士嘗合崇仁明察剛毅廉公有
 聲聞四馳其政已成而擢於此然則家詩書戶禮樂聞一
 州而絃歌以還分寧之舊不端有賴哉孟子曰子力行之
 亦以新子之國廉於葉君亦云故為記以及之
 陳瀾明通公溥堂記曰寧州古分寧邑也邑茲土以治惟
 訟繁政劇之是病邑者難之都使者習常重改弊則日深
 益稱難治維宏治癸亥都憲林公奉命蒞茲省加惠元元
 尤篤意於寧遂率其監司郡守官會於寧考不治狀乃知
 其縣秩既卑無以攝伏豪右而宰復不得其人法雖存無
 所用之計非隆其秩廉其才以彈壓之不可用是走驛使
 以狀聞於朝遂革縣而升之州乃訪旁郡良吏以政績著
 者得葉侯於崇仁舉以為州守而委之新政焉侯下車彰
 善痺惡軌民於法葺年而政成弊蠲利興賦增訟簡而寧
 遂為江右之治郡侯既新其人又新其州治之舊額顧退
 處之堂棟宇將撓殆不可事事侯曰昔先正濂溪周子筮
 仕為分寧主簿斯堂蓋先生所嘗憩焉者也在寧人固宜
 有甘棠遺愛之思在郡守不可無緇衣好賢之志必在利

民非徒作者故記之以為寧人告俾來者知有所自且有
 所法

知州方沆記略曰分寧之為郡介萬山中夙號未易治屬
 頃歲薦飢賦積逋而囂訟繁興主者聽甚高而弗察逮追
 呼而潮汐遞至官與民交病蚤夜皇皇幸脫身去即解宇
 掌故竅墜因循不佞性最慙受事以來稍撰次寧志缺之
 目擊門外內傾頽闌入者無禁旌善申明二亭亦漸就圯
 狂狴湫隘風雨不蔽去歲遂釀出柙之變中心焦勞苦不
 能一朝居者廼請兩憲道府諸大夫發藏金三千有奇不
 足則佐以餘俸檄杉市巡檢徐汝楫督老人李廷震查國
 利撤而葺之義民陳德平德讚山有材平其直以授匠氏
 肇於萬歷乙未初夏乙卯訖於季夏辛未幸而落成嗟夫
 不佞誠慙豈欲為吏長子孫哉巡檢拮据效勞老人若諸
 匠作用命競勸抑豈博名高而竊餘潤邪蓋不有廢者孰
 思與興不有勞者孰有其逸不佞縱秋風起而思葺鱸乎
 後之君子倘尋繹端緒官署吏解次第鼎新俾寧之民日
 漸涵於政平訟簡之化庸詎知非不佞劍首一映力也巡
 檢請一言紀歲月共事者州同知謝誥判官柯熹年吏目
 注世祐八叠巡司巡檢
 薛佑范模法得備書

州儒學署詳學校

州同署在大堂東 州志

州判署在大堂西 州志

吏目署在州同署前 州志

排埠塘巡檢署在仁鄉雍正六年建 州志

八疊嶺巡檢署在州南奉鄉明正統四年與奉新新昌合

建宏治間葉天爵重修後裁

國朝雍正六年復設 州志

杉市巡檢署在崇鄉乾隆三十年裁 州志

銅鼓營同知署雍正四年建移瑞州府同知駐銅鼓營 據

冊新增

銅鼓營都司署即原守備署明萬曆四年建

國朝乾隆四十五年借廉修理 州志

移駐銅鼓瑞州千總署雍正六年奉文動帑建 州志

銅鼓把總署雍正六年建 州志

按銅鼓營同知本瑞州府所轄惟駐劄之地半屬寧州而該處倉糧專歸南昌府稽覈其所設都司等弁皆隸南昌故附載於此

南昌府志卷四終

南昌府志卷四終

南昌府志卷四終

南昌府志卷四終

南昌府志卷四終

南昌府志卷四終

南昌府志卷四終

南昌府志卷四終

